

BAHEBERU,

KHAOLO EA BOTŠELELA ²



. . . ho batlisisa Lentsoe Oona le thekothata.

Ke kene, nakoana e fetileng, 'me ke ne ke jere Bibeletse tse peli. Ke ne ke tšoere hlahlobo ea sephiri le leleiti morao mona, 'me ka re ha nka rera ka tsona tse peli, e tlameha ho ba therō e khabane. Empa ena ke tlotlontsoe ea Segerike, ke nthoana eo ke batlang ho bala ho eona, bosiueng bona. Ke e—ke e. . . Ke phetolelo ea lentsoe ka lentsoe, ho tloha ho Segerike, ho ea ho Senyese mane. 'Me e nthusitse haholo leetong ho tla joalo. 'Me ke batla ho bala nthoana feela ho eona, hobane joale re ntse re hlahloba Buka ena ea Baheberu, 'me re atamela lintlha tse tibileng haholo joale.

²¹⁹ Ke boletse Moena Neville, metsotso e 'maloa e fetileng, “Re tšoarana le karolo eo batho ba ingoaeang lihlooho le ho re, ‘Ha ke e lumele.’” Ua bona? Ke mofuta oo re kenang ho ona. Ke hona moo re e ratang teng.

²²⁰ Moreri e mong o mpoleletse, a re, “Be, kea kholoa ho tla hle ho ingoauoe lihlooho.”

²²¹ Ka re, “Ke sona seo re batlang ho se etsa.” Ua bona?

²²² Bibeletse e ka bolela ntho e le 'ngoe feela. E ke ke ea bolela lintho tse peli. 'Me ekare ha karolo e 'ngoe ea Bibeletse e bua ho hong, 'me karolo e 'ngoe ea Bibeletse e bua ho hong, phoso e teng. Ua bona? E tlameha ho bua ntho e tšoanang, tsela eohle. Empa, hopola, ha u hlahloba Bibeletse, “E patetsoe mahlo a ba bohlafe le ba masene, ea senoleloa masea,” hobane ke Buka ea moea.

²²³ 'Me Eo ha se buka ea bophirima. Ke Buka ea bochabela. 'Me E ka tolokoa ke ntho e le 'ngoe feela, 'me eona ke Moea o Halalelang. Kea tseba mang la mang oa rōna o batla ho bua, a re, “Moea o Halalelang o re bolella seo re se lumelang ho Eona.” Be, joale, haeba Lengolo ka leng le tsepama ka ho tšoana, e tla be e le Moea o Halalelang. Haeba le sa tsepame, le hlahisa sekheo *mona*, le sekheo *mona*, phoso e teng ka bolumeli ba rōna. 'Me, oh, Ke Buka e babatsehlang.

²²⁴ Joale, e re re sa hlahloba ke le batla le etsa sena. Joale, re tlameha ho tsamaea hoseng ho ea Wyoming, ha Morena a ratile. Le re rapelle.

'Me veke ena e tlang, Moena Graham Snelling, mona. . . O teng. Ke mo utloile, metsotso e 'maloa e fetileng, a etsa litsebiso tsa hae. 'Me kereke ena e tšehetsa tsoeletso ea hae ka botlalo. 'Me re ntse re rapela Molimo, ho mo abela

ho khaphatsehang, ho tlolisang, le tsoeletso e kholo. Moena Graham o ne a tsoere tsoeletso ea Moena. . . holimo mona Charlestown, Moena Junior Cash, 'me ha sokoloha meea e lekholo hantle, kea kholoa. [Motho o re, "Mashome a metso e mene."—Mong.] Meea e mashome a robeli a metso e mene. Ka hona, mono, re isa thoriso ho Molimo. 'Me re tšepa ho tla hlaha meea e makholo a mahlano le mashome a robeli a metso e mene holimo mona, tulong ena mona.

²²⁵ Moena Graham o kopane le 'na kajeno, 'me o itse, "Joale, Moena Bill, ke kholoa u utloisisa hobane ha kea tla koano ho qala mosebetsi o mong o khahlano le tabernakele, hobane le 'na ke karolo ea tabernakele." O mpa a tlile koano feela ho . . . Pelōng ea hae o mpa a ikutloa ho tšoara tsoeletso, 'me o tataisoa ke Morena ho e etsa. 'Me—'me o mema basokolloa, 'me o na le kereke, ho ba tšela hantle ka hare, "Kereke ea lehae ke ena, haeba u kena kahara eona, u sokolohē."

²²⁶ 'Me ke tsoanelo ea rōna, joaloka Bakreste, ho mo tsehetsa ka sohle seo re ka se khonang. 'Me Morena a hlohonolofatse Moena Graham. 'Me lona, e mong le e mong, le memeloa kopano ea Moena Graham holimo mona, ka tumello e tletseng ho tsoa kerekeng ena, ka tšebelisano e tletseng ho mo thusa ka mokhoa ofe oo re ka o khonang, bakeng sa meea le bakeng sa 'Muso oa Molimo.

²²⁷ Morena a u hlohonolofatse, Moena Graham, a u abele likopano tse kholo. Ha a tsebe mohla a tla koala. O mpa a qala feela. 'Me ka hona, Moena Graham o kopane le tsona joaloka 'na, *meepa* le *metheo*. Le bophelo bo tsamaea joalo. Re ananela *meepa* hoba re theohe *metheo*. Ha motho a e oa ebe o rapalla mono, ke lekoala. Ke na le tšepo ho monna ea tsohang a boela a leka. Ke hantle. Kea kholoa le utloisisa seo ke bolelang. Joale, le se ke la e lebala, veke ena e tlang.

²²⁸ Joale, Bukeng ena ea Baheberu, bosiuung bona ha re khutlele morao motheong.

²²⁹ Joale, Sontaha se tlang, ha Morena a ratile, Moena Neville o tla tsebisa. Moena Cox mona, kapa ba bang ba bona, ba tla mo tsebisa, ha re ka kena ka nako bakeng sa kopano ea Sontaha se tlang. O tla e tsebisa radiiong. 'Me rea. . . Bohle le mamela radio ea hae joale, 'me—'me—'me le meme baahisane ba lona bohle ho mamela. Ke hlile ke thabela ho mamela thero ea bona le 'mino, khotete ea Neville. Ha ke rialo hoba a lutse mona. Hala ke itsalo, 'me e sa tsoa pelōng ea ka, ekabeba ke moikaketsi. Ke hantle. Nka lokela ho baka. Empa ke e bua ke tiile. Nka mpa ka mo hloma palesa ea rosa hona joale sebakeng sa lesihla lohle la khare mohla a seng a tsamaile.

²³⁰ Ka mohla o mong ha ke tsoa monyako mono, ha feta leleiti, la re, "Moena Branham, oh, ka tla ka thabela molaetsa oo hle!"

²³¹ Ka re, "Kea u leboha." Ka ikutloa monate.

232 Motho e mong a feta, ha thoe, “Moena Branham, ke thabela Molaetsa oo.”

233 Ka re, “Kea u leboha.”

234 Mono keha ho eme morerinyana, a tsoa ka mona leboea ho naha, lebatooa, a re, “Ho bokoe Molimo, ha ke batle batho ba iphafang ka ’na ha kaalo.”

235 Ka re, “’Na ke joalo.” ’Me ka re, “Phapang lipakeng tsa ka le uena e ’ngoe feela. ’Na kea tšepahala ka eona.” Ke hantle. Bohle re rata ho utloa mantsoe a monate ka rōna. ’Me ke—ke nahana ho le hotle ho bua mantsoe a monate ka eona. ’Me ha u batla motho a bue hantle ka uena, bua hantle ka motho e mong. Ke eona tsela ea ho e sebetša, ke moo u tlang ho bua lintho tse ntle ka mang le mang. ’Me hoo ho phikolosa lebili hantle ho feta.

236 Joale, tabeng ena, Sontaha se tlang, ha Morena a ratile, ho latela mohopolo oa ka, re tšoare, re ntse re tebe ’me re teba ho kena liphiring tse kholo tsena tsa Molimo. Re kena ho Melkisedeke: hore e ne E le Mang, moo A tsoang teng, moo A ileng teng, se etsahetseng ka Eëna, le tshole tse amanang le Melkisedeke.

237 ’Me joale, bosiuung ba Laboraro le fetileng, Moena Neville o otlile khaolo e qetellang ea BoMolimo bo tlotlehang le boprsta ba Morena Jesu oa rōna, e qalang koana tšimolohong, “Molimo, o buile le bontate mehleng ea khale le ka mekhoha e mengata ka baporofeta, letsatsing lena la ho qetela o buile le rōna ka Mora oa Oona, Krete Jesu.”

238 Ebe o tsoelapele, le ho qala ho bolela le ho bapisa hore E ne e le mang, ho Mo theolela tlase khaolong ea 5, qetellong ea khaolo ea 5.

239 Eaba ho qaloa ka khaolo ea 6, re fumane sena thutong ea rōna ea hoseng hona.

Ka baka leo a re feteng litaba tsa thuto ea Krete tseo ho qaloang ka tsona, ’me re feteleng ho tsa kholo e tletseng; . . .

240 Ba ileng ba natefeloa ke molaetsa oa kholo e tletseng ba bakae? [Phutheho e re, “Amen.”—Mong.] “Ha re feteleng ho tsa kholo e tletseng.” E ne e le Molaetsa oa rōna, hoseng hona, khaolong ea 6 ea Baheberu.

241 Joale re kena moo re qalang re finyella karolo ea—ea makhonthe. Oh, bohle re ka lumellana ka lintho tsena: mabapi le BoMolimo ba Jesu Krete; le ho beng ha Hae Mora oa Molimo; le kamoo A neng a ena le Molimo, le Molimo o le ho Eëna; ’me A le ka ho Molimo, le Molimo o le ka ho Eëna, le joalo. Bohle re lumellana ka eona. Empa, joale, ho tloha mona, ha ke tsebe re tla lumellana joang. Ka baka leo e ka bang eng, masiuung a mang le a mang a ’maloa, re tla le nea monyetla ho ’ngolla ntlhanyana le bolele seo le se nahanang ka Eona.

242 Ebe moo ke tla tšoanela ho arabela lipotso. 'Me ha ke sa li fumane, ke tla re, "Moena Neville, u nahana'ng ka eona?" Ke tla re, "Ke eo. E re a e arabe." [Moena Neville o re, "Ke mohla ke tla bala Segerike."—Mong.] Ke mohla A tla bala tlotlontsoe, a hotōlle Segerike. Ke hopola e le nako ea ka ho e etsa, le 'na.

243 Empa, joale, ha re ka theoha ra tšepahala ka ho tiea, 'me ra tlela morero o le mong feela, oona, ke ho ituta. Ke batla ho ithuta, le 'na. 'Me Bible e ngotsoe, ho itsoe, "Eona e... Mangolo ha hlahisoa ka boithalasetso ba motho." Hoo ho boela hore Lengolo le tlameha ho hlalosa Lengolo le leng. Ua bona? Lengolo ka leng le tlameha ho hlalosa le leng, ho haola le Bible eohle, ho e fetola nthohali e le 'ngoe. Hobane, Molimo o ke ke oa fetoha, hobane Ke Molimo o sa fetoheng.

244 Joale, "Ha re feteng..."

Ka baka leo a re feteng litaba tsa thuto ea Krete tseo ho qaloang ka tsona, 'me re feteleng ho tsa kholo e tletseng;...

245 Ke rata Pauluse ha a bua litaba tseo. Pauluse e ne e se motho ea ratang ho lula nqa e le 'ngoe. O ne a rata ho tsoelapele, ho teba. Ka mohla o mong, kahara Lengolo, o itse, "'Na, ke lebala tse fetileng, ke hahamalla pheo e holimo ea pitso." Ua bona? O lula a hatela ka matla.

246 Mona o itse:

Joale ho lebala litaba tsa thuto ea Krete tseo ho qaloang ka tsona (hore e ne e le mang, seo a neng a le sona), 'me re feteleng ho tsa kholo e tletseng;...

247 Joale rona, pele, re ne re batlile ho fumana, "Na ebe re ka phetheha?" 'Me re fumane, Mangolong hoseng hona, Mattheu 5:28, Jesu a boletse re "tlameha ho phetheha joaloka Molimo," ha ho se joalo re ke ke ra kena.

248 Eaba re fumana hobane rōna, e mong le e mong, "re tsoaletsoe sebeng, re bopetsoe bokhopong, re tšile lefatšeng re bua mashano." 'Me ho se letho le lokileng ka rōna, ka hona ebe re ke ka phethahatsoa joang le ka mohla?

249 Joale seo re se fumaneng lekhateng leo ke sena, koana, palong, ha re qotsa Lengolo ka Lengolo, ho re, "Jesu, ka sehlabelo se le seng, o phethisitse, kamehla, Kereke ea Hae." Eēna...Ke moo re phethehileng, ka Krete. 'Me lokolotsoe kaholong, ka Krete. Re ke ke ra hlola re eshoa, ka Krete. Re lahlile lefu 'me re fumane Bophelo, ka Krete; ha se ka kereke efe, ha se ka bolumeli bofe, e seng ka semaka sefe, ha se ka ho bua ka lipuo, ha se ka ho hlaba litlatse, ha se ka ho thefuleha, ha se ka ho hobela Moeeng, empa ke ka mohau.

250 Molimo o bitsa eo O mo batlang. 'Me ntho eohle ke khetho, rea fumana. Rea fumana, ho re, "Ha se ka ea batlang ho bolokeha. Ha se ea ratang kapa ea mathang; ke Molimo

o hauhelang.” “‘Me ha ho ea ka tlang ho Jesu a sa huloa ke Molimo, pele.” Ebe u amana le eona ka eng, le hona? U ke ke ua etsa letho ka eona. U ntšitsoe lephallong, ka botlalo.

251 Re fumane motho a sa batle Molimo le ka mohla. Ke Molimo o batlang motho. Ra boela ra fumana, hape, hore Molimo ke mohloli oa Bophelo Bosafeleng. Ra fumana hore sohle seo e leng sa Bosafeleng ha se na qalo kapa ha se na qetello. Ka baka leo, re fumana lihele li bile le qalo, 'me li na le qetello. 'Me ntho e 'ngoe feela. . . Ha ho mang ea ka reng. . . Lihele ke tsa kamehla, kamehla, e, kamehla, empa ha se tsa Bosafeleng.

252 *Kamehla* ke “nako e baliloeng.” Bibe e re, “Kamehla le kamehla.” 'Me ako shebe haeba *kamehla* e sa bolele “nako e baliloeng.” Jonase o ipoletse a hlotse mpeng ea hlapi “kamehla.” Le Mangolo a mang a mangata, *kamehla* e bolela feela “nako e baliloeng.”

253 Empa, Bosafeleng, ke kamehla, ke kamehla le kamehla le kamehla le kamehla le kamehla. Ke Bosafeleng. 'Me re fumana lihele e se tsa Bosafeleng, empa ke tsa kamehla. 'Me lebaka, u tlameha ho hlokomela mantsoe ao, joale. Ha u sa etse, u a lubakana. Joale, hopolang, lintho tse sa kang tsa simolla, ha li na qetello. Ka baka leo, Jesu o boletse, “Ea utloang Mantsoe a Ka 'me a lumela ho Ea Nthomileng, o na le Bophelo,” ba kamehla? Na le utloahala hantle? Che. “O na le Bophelo Bosafeleng.” 'Me lentsoe *Bosafeleng* ke “Molimo.” Lentsoe, ke lena hantle mona tlotlontoeng ea Segerike, Zoe Bophelo ba Molimo bo ahile ka ho uena. 'Me u phela ka Bosafeleng joaloka Molimo le oona e le Bosafeleng, hoba ka ho uena u na le Molimo.

254 Tlhaho ea hao ea khale e shoele, tlhaho ea lefatše, 'me u fetoha 'mopuo e mocha. 'Me litakatso tsa hao, bophelo boo ba khale bo qalileng mohla Molimo o no o bululela phefumoloho linkong tsa hao, mohla o no o tsoaloe, bophelo boo ba tlhaho ea nama bo shoele. 'Me bo bile le qalo 'me bo bile le qetello, 'me bo ile ba shoa 'me ba felisoa kamehla, tlhaho eo ea khale. 'Me eaba Molimo o kena ka Tlhaho e ncha. Ke moo, lerato, thabo, khotso, mamello, bonolo, khotso, tiisetso, le mosa, le molemo, li ileng tsa kena; 'me tsa suthisa lonya, le mabifi, le lehloeo, le—le boetsisi, ntoa, le lintho tseo tsohle. Hoo ho tlatsitse malulo a hoo, mohla u no u falla lefung ho kena Bophelong. Na u e tsoara, ka kelohloko, joale? [Phutheho e re, “Amen.”—Mong.]

255 Ka baka leo, mamelang. Mofuta oa Bophelo Bosafeleng o mong feela. Ako Bo fumane. Ke hore, Molimo o ruile Bophelo Bosafeleng o inotši. Bibe e itsalo. Molimo o ruile Bophelo Bosafeleng o inotši. 'Me efèla haeba motho a tla hohlokoatsoa lihelong, kamehla, o tlamehile a be a ena le Molimo, Bosafeleng. Empa ke bua hoo mono. . .

256 Joale, hopolang, ha ke re lihele tse tukang ha li eo. Lihele tse tukang li teng, mollo le sebabole. “Moo e—e seboko sa teng . . . mollo oa teng ha o time le seboko ha se shoe,” tsa mollo le sebabole, kotlo. Li ka qeta bilione tse lekholo tsa lilemo. Empa li tlameha ho ho ba le bofelo, hoba lihele li bopetsoe liabolosi le mangeloi a hae. ’Me ntho efe le efe eo Molimo, ka Sebele, e bileng teng tšimolohong, ntho eohle e tsoile ho Molimo. Mohla oona moea . . .

257 Ako nke *Moea* oa lerato feela, e ne e le seliba sa Molimo, se se nang sekoli, se sa silafalang. Ho tloha mono, ho tsoa lerato le *khopameng*. Ho ntano latela lerato la *botho*. Ho ntano latela lerato la *bong*. Ho ntano latela marato a mang, marato le marato, ha a phetse ho khopama hofihlela eba *litsila* feela. Empa lintho tseo tsohle li bile le qalo. ’Me tsatsi le leng li tla khutlela tšimolohong; ke Bosafeleng; moo takatso, lerato la botho, lerato la cheseho, marato ao oohle a tla tlameha ho khaotsa.

258 Maipheho-bolumeli ana oohle a Tumelo a tla tlameha ho khaotsa. Tumelo ea sebele e ’ngoe feela. Tse ling tsohle li tla tlameha ho khaotsa. E ne e le likhopamiso tsa seliba sena sa makhontho.

259 Ka baka leo, ha ho le joalo, lihele, tšotleho, tšotleho hase ea Bosafeleng. Tšotleho e hlahisistsoe ke sebe, ’me sebe sa kenya tšotleho. ’Me mohla sebe se felileng, tšotleho e tla tlameha ho khaotsa, le eona. ’Me ho fihle mohla baetsalibe, ba sa kang ba amohela Krete, hoba ba otloe ka lilemo tse ka bang bilione tse lekholo tsa lilemo, . . . ha ke tsebe, mohlomong ka bilione tse milione tse leshome tsa selemo. Nke ke ka bolela. Empa e tla tlameha ho fela, ka mohla o mong, hoba hase tsa Bosafeleng.

260 Joale, re tla hatella ka matla ho tsoelapele joale, ho fetela phethehong. Joale mamelang, re sa kena Molaetseng.

*. . . re se boele ra thea motheo oa ho baka
mesebetsing e shoeleng, le oa tumelo ho Molimo,*

*Le oa thuto ea likolobetso, . . . peo ea matsoho, . . .
tsoho ea bafu, le . . . kahlolo ea ho sa feleng.*

261 Joale mamelang. Re tsoere lintho tse peli. Mona re tsoere setšoantšo, hona joale. Joale mona re tliil’o hanana ka matla. Joale re tlameha ho bona moo setšoantšo se leng teng. Pauluse o a leka, mona, ho khetha *molao* ho *mohau*. Re tsoere litšoantšo tse peli: se seng, ke sa nama; se seng, sa moea. ’Me Pauluse o ntse a leka ho—ho khethollla bobeli boo, ho bontša Bajude. Lengolo lena le ngoletsoe Baheberu. ’Me Baheberu eohle e leka ho bontša paterone ea Testamente ea Khale e bapisang e Ncha. Ka baka leo, mona u tlameha ho nahana ka litšoantšo tse peli.

262 Joale le mamelise re sa bala. Joale oitse:

...re feteng litaba tsa thuto ea Kreste, 'me re feteleng ho tsa kholo e tletseng;...

263 Joale, re tšoere hoo hoseng hona, kamoo re phethisisoang. Ho phethisoa, ho hloka sekoli le molato ka botlalo, ha ho sebe se le seng holima rōna. Na u phahametse moleko? Lekhale. Na u etsa sebe letsatsi ka leng? E, monghali. Empa, leha ho le joalo, re phethahalitsoe kaha re le ka ho Eèna. 'Me Molimo o ke ke oa re ahlola (e ke ke ea eba ho loka), O se a re ahlotse ka ho Eèna. Mohla O ne o ahlola Kreste: O ile oa nkahlola, O ile oa u ahlola. 'Me O ke ke oa nkahlola hape, hoba O ile a jara kahlolo ea ka haeba ke lopolotsoe.

264 'Me ke tšoere tekete e ntšupang ke lokolotse tšupanako ea ka ponoshopong, e re motho a leke ho e khutlisetsa ponoshopong hape, athe ke tšoere tekete. Ke e lopolotse.

'Me ha liabolosi a ka leka ho nkahlola, ke tšoere tekete e ntšupang ke lopolotsoe. E, monghali. Kahlolo ha e sa le eo! "Ea utloang Mantsoe a Ka, 'me a lumela ho Ea Nthomileng, o na le Bophelo Bosafeleng, 'me a ke ke a tla kahlolong, empa o tlohile lefung ho kena Bophelong." Ke tekete ea ka eo. O tšepisitse.

265 Joale, joale setšoantšo, mona.

...re se boele ra thea metheo ea ho baka mesebetsing e shoeleng, le...tumelo nqa ho Molimo,

...oa thuto ea kolobetso,...peo ea matsoho,... tsoho ea bafu,...kahlolo ea ho sa feleng.

266 Joale, hopolang, na u boela u bona lentsoe leo le sebelisoa? Re le sebelisitse hoseng hona, "Kahlolo ea Bosafeleng." Hang ha Molimo o bua, Ke Bosafeleng. E ke ke ea fetoloa, le hanyenyane. Ka hona, kahlolo ke ea Bosafeleng, kamehla Ke kahlolo. 'Me ho sa tsotelehe moloko oo re phelang ho oona, moloko o mong o tla phela, le molao o mong o tla phela, 'me ke kamehla... ekaba nako e kae, le *sena* le *sane*. Empa kahlolo ea Molimo ke ea Bosafeleng, O tlamehile joalo, hobane O buile Lentsoe. Molimo ha o bua Lentsoe, eka khona E be la Bosafeleng. Ke hantle.

267 Joale ha nke ke le balle eona ka Segerike. Mamelang kamoo e baloang kateng.

Ka baka leo ha re feteng—feteng litaba tsa lithuto tsa Kreste, e leng Ea lumeletsoeng, re tlameha ho hatèlla—hatèlla nqa...

Joale, ha ke khone ho le bala. E lerootho. "Re se boele ra thea mokhoa..." Ke rōna bana.

...re se boele ra thea mokhoa oa hlabollo oa mesebetsi e hlahisang lefu.

268 Joale, ehlile tlotlontsoe ena ha se phetolelo, ho hang. Feela ke lentsoe la Segerike le buoang seo Senyesemane se se bolelang. 'Me se itse, "Joale ha re batle..." Mamelang mona, ua bona.

...re se boele ra thea mokhoa oa hlabollo oa mesebetsi e hlahisang lefu.

269 Joale ha u ka e kenya kelellong ea hao, seo a se buang mona, ho thoe, “Mekhoa ea hlabollo e hlahisa lefu.” Pauluse o boletse, “Ha re feteng litaba tsa lithuto, re feteleng kholong e tletseng, re se boele ra thea motheo oa pako mesebetsing e shoeleng le oa tumelo nqa ho Molimo: lithuto tsa kolobetso, peo ea matsoho, tsoho ea bafu, kahlolo ea Bosafeleng. Mekhoa ea hlabollo e hlahisang lefu,” e ne e le mantsoe a nêpahetseng. Ehlile ke seo Pauluse a se ngotseng. Le bona seo a le kang ho se etsa?

270 Joale, lintho tsena tsohle, tse kang likolobetso: e mong o kolobetsoa ka seetse, e mong a kolumetse, e mong ka lebitso la Ntate, Mora le Moea o Halalelang, e mong ka lebitso Jesu, e mong ka mokhoa *ona*, le ka mokhoa *oane*, le lintho tse fapaneng tsena tsohle tsa likolobetso.

271 Le oa peo ea matsoho: “Ho bokoe Molimo, ke na le neo ea peo ea matsoho. Alleluia! Uena, u ka O fumana ka mokhoa *ona*. Alleluia!”

272 Ho feta hoo hohle, kaha e le mesebetsi e shoeleng, lihlabollo tsena tsohle, ho hlabolla. Ua bona? U ntse a bua ka sehlopha se seng. Joale o itse, “Ha re tloheng moo, re feteleng kholong e tletseng.” Lea E tsoara? [Phutheho e re, “Amen.”—Mong.]

273 'Me kereke e saletse morao linthong tseo. Ba ne ba ntse ba leka ho etsa hoo. Kereke ea pele ea Baheberu e lekile ho re, “Be, ke kolobelitsoe ka ho qoelisoa, 'me—'me ke fumane *sena*, le *sena*, le lintho *tsena* tsohle.”

274 O itse, “Joale, hoo hohle le ho beelle kathoko, le ho siee morao.” Empa, joale, na o itse le se ho etse? Joale mamelang seo a se buileng mabapi le eona.

'Me re tla etsa joalo, . . . Molimo o lumella.

275 Ea mantlha e boletse hona hoo.

Re tla etsa joalo, ha Molimo o re lumella, ua bona.

Re tla etsa joalo, ha Molimo o re lumella.

276 Likolobetso, peo ea matsoho, le lintho, empa ha lia phetheha. Ke lihlabollo tsa nama feela. 'Me ke hona moo likereke li e tlohelang teng, kajeno, ke holima hlabollo eo ea nama. E mong oa bona o itse, “Oh, be, metsi, lentsoe *kolobetso* le bolela *sena* 'me le bolela *sane*.”

277 'Me ba thea mekhatlo: e mong o a fafatsa, e mong o a horometsa, e mong o kolobetsa sefahlehlo se thulametse pele, e mong ka seetse, le lintho tseo tsohle; ba bang ba bea bakuli matsoho, 'me ba bang ba tlotso baapostola, le ba bang ba tlotso baporofeta le ba joalo, ka peo ea matsoho; le ka ho rera tsoho ea bafu, athe etsoe e itoketse, BoMolimo phahameng ba

Kreste, hoo ho itoketse. “Empa,” o boletse, “tsena tsohle ke lihlabollo tsa tloaelo. Re mpa re hlabolla feela. Joale ha re feteleng kholong e tletseng.” Na le hlakeloa ke setšoantšo seo? [Phutheho e re, “Amen.”—Mong.]

278 Joale le shebe. Mona joale ho kena karolo e tebileng.

*Hobane ba seng ba kile ba bonesetsoa, ba lekileng
neo ea leholimo, ba filoeng kabelo Moeeng o
Halalelang,*

*Ba latsoitseng lentsoe le monate la Molimo, . . . matla
a bophelo le tlang ho tla,*

*Bao ha ba ka oa, ha ho kamoo ba ka boela ba
nchafatsoa kateng hore ba boele ba bake; hobane ba
boela ba ithakhisetsa Mora Molimo, ba mo etsetsa
nyeliso.*

279 Joale, hona joale ke tseba mohopolo oa lona boramolao, empa le fositse. Ua bona? Ke hantle. Ke ema holima sena, 'me Bible e a e tšehetsa, ho re, “Efèla motho ha a pholositsoe ke Molimo, o pholositsoe ka nako le ka Bosafeleng.” U ke ke ua E buisa letho lesele.

280 Ramolaotheo e mong o ne a tle ho 'na, nakoana e fetileng, a re, “Ke u tšoareitse le leng, Moreri Branham. Ke u tšoareitse le leng. U itse, ‘Motho ha a pholositsoe, a ke ke a timela le ka mohla o le mong?’”

281 Ka re, “Ke seo Molimo a se buileng.”

282 A re, “Ke batla ho u botsa taba. Saule e ne e le moporofeta, 'me o kile a porofeta. Etsoe u mo tseba e ne e le motlotsuo oa Molimo. Bible e mo tlalehile joalo. 'Me eaba o a ipolaea, 'me a lahleha.”

283 Ka re, “Ebe o entse joalo?” Ka re, “Bible e mo tlaleha a ile a 'pholoso.' Hoba a fetohe sera sa Molimo, o ile a bolokeha. Bible e mo tlalehile joalo. 'Me, ebile, ha a ka a ipolaea. O bolailoe ke Moflista, eaba Davida o bolaea Moflista ka ho mo bolaea. Ke 'nete o ile a ithela holima sabole ea hae, lerumo la hae, sabole, empa, ehlile o entse hoo. Hase eona e 'molaileng. O bolailoe ke Moflista. 'Me mohla Saule a ne a theohetse ho senohe, 'me sona sa nyolla moea oa Samuele, kaha a ne a eso kene Khanyeng, o ne a le paradeising tlasa mali a tšolohileng a lipoho le lipōli a sitiloeng ho tlosa sebe. Empa o ne a tlamehe ho fumana nqalo ea phomolo, e bitsoang paradeisi, hofihlela a kena kahare.”

284 Lona batho ba Katolike le lobokane hona mona. Ua bona? Joale, paradeise ha e sa fumanoa hona joale. Re kena hantle ka pela Sefahleho sa Molimo.

285 Eitseha senohe sa Enedore se nyolla moea oa Samuele, keha a eme mono. Eaba o itiha ka sefahleho, a re, “O nthetselitse'ng na?”

286 'Me Saule keha a sa ema mono feela. . . Ke bolela Samuele, o ne a apere likobo tsa hae tsa moporofeta, e ntse e le moporofeta. O itse, "Hore'ng u nnyolotse phomolong ea ka," ho re, "haele moo u ipeile sera sa Molimo?"

287 A re, "Be, esita le Urime ha e sa buisana le 'na. Le moporofeta ha a sa moporofetela. Ha ke sa lora le toro."

288 "Be," Samuele a re, "u ipeile sera sa Molimo. Empa hosane ntoa e tla u imela, 'me hosane u tlil'o shoa. 'Me ka nako eona ena, hosane bosiu, u tla ba le 'na." Efèla ha Saule a lahlehile, Samuele le eèna, kaha ba ne ba le 'moho bobeli. Ruri. Bibe e itsalo.

289 Joale, u ka fuluhua ke maikutlo, ka ho bua ka lipuo, ho hlaba litlase, ho thefuleha, ho tsukutleha, ho mathela holimo-le-tlase lipakeng tsa litulo. Ha ho letho khahlano le eona. Empa u ka ithetsa ua re u bolokehile athe ha ho joalo, ha u a pholoso. Bophelo ba hao bo tla paka seo u leng sona. Jesu o boletse joalo, "Le tla ba tseba ka ho bea ha bona." U tla pakoa ke bophelo ba hao haeba u pholositsoe kapa che, leha u sa ahlamise molomo oa hao. Bo tla u paka seo u leng sona.

290 Empa phuluho ena eohle le maikutlo le ho ingolisa kerekeng, "Me ke kolobelitsoe ka Lebitso la Jesu, allelua, ke tseba ke O fumane ke hona," hoo ha ho bolele letho.

291 "Ke kolobelitsoe, lebitso la Ntate, Mora, Mora o Halalelang, sefahleho se thulametse pele, ka makhetlo a mararo. Ke O fumane." Hoo ha ho bolele letho.

292 Pauluse o itse, "Ha re feteleng phethehong joale." Re ntse re bua ka ba entsoeng baphethehi. 'Me ha re ka theoha le eona, le tla fumana, bao ba entsoeng baphethehi ke Bakhethoa. Ke tla le pakela eona, metsotsong e 'maloa, ka Bibe e. Ke Bakhethoa bao Molimo, pele ho motheo oa lefatše, o bone e mong le e mong oa bona. 'Me Oa romela Jesu ho lopolla batho bao, e seng lefatše lohle. O ne a batlile joalo, empa O no a tlamehile ho etsesa bao tsela. 'Me mokhoa o le mong oa Oona ho etsa hoo, e ne e le ho romela Krete; A tle a tle, e le pheko ea libe tsa rōna, hore bao ba khethiloeng, A tle a tlise ho Eèna, Khanyeng.

293 Le ka nahana ka Molimo o laolang ofeisi ea Oona bohlasoa hakalo, eka ho thoe, "Be, motho a ka tšoha a Nqenehela, mohlomong ba tle ba pholoso?" Molimo ha u a tlameha ho u qeka ho etsa letho. Le ho qeka, ke uena ea hlokang ho qeka, e seng Molimo.

294 Ebile hape, Krete o shoele ho pholosa bao Molimo, ka boitsebelopele, o ba khethileng ho kopana le Oona koo ba se na letheba le sepha. Pele ho motheo oa lefatše, O u bone Khanyeng. Bibe e itsalo, ho Baefese, khaolo ea 1. Khaolo ea 5, temana ea 1. Molimo o no o rere ka boitsebelopele.

295 Joale, efèla ha Molimo o entse hoo, o re rerile le pele ho motheo oa lefatše; 'me o tsebile e mong le e mong oa rōna ka

lebitso, le pele ho theoa lefatše; 'me Oa re Khethela Bophelong Bosafeleng; oa romela Jesu Kreste ho re lopolla; ke ho re, lilemo tse likete tse tšeletseng tse fetileng, O re bone, hore re tle re hlahisetsoe lithoriso tsa Oona Khanyeng! Ebe u ka lahleha joang le ka mohla?

²⁹⁶ Joale, ha u fèla u pholositsoe, u pholositsoe. Ha Molimo a u pholositse bosiueng bona, athe O tsebile a tla lahlehelo a ke uena lilemo tse leshome ho tloha kajeno, ekabeba O senya morero oa Oona ka Sebele; mohlokapeletso, Eamatlaohle, RaBosafeleng, ea ruileng bohlale ba kamehla, Molimo, ekabeba ha o tsebe haeba u tla tsoarella kapa u tla sitoa. Ka hona, ha A u pholosa, u re, “Be, ke tla Mo leka. Ke tla bona seo A se etsang,” ekabeba ha O tsebe qetello esale qalong. Molimo o tseba seo O se etsang, u se ke ua touta ka eona le ka mohla. Ba khoptjoang ke 'na le uena. Molimo o tseba seo O se etsang. 'Me O re tsebile re. . . haeba re tla tiisetša, kapa seo re tlang ho se etsa.

²⁹⁷ Joale, Bible e itsalo, ka Esau le Jakobo, le pele ho tsoaloa ngoana ofe, Molimo o itse, “Ke rata e mong, athe ke hloile e mong,” le pele ba hema phfumoloho ea bona ea pele, hore morero oa Oona oa khetho o tle o eme o tiile.

²⁹⁸ Abrahama e ne e le mang? Re tla mo finyella metsotsong e 'maloa, tlase mona. E ne e le mang, ho ka bitsoa ke Molimo? A pholoso e sa etsa letho. Molimo o hlaba selekane le motho; motho o roba selekane sa hae. Empa Molimo o hlabile Selekane sena le Oona, oa ba oa se hlapanyetsa, ka Oona. Motho ha a amane le sona ka letho. Ke boitsebelopele ba Molimo. O entse hoo, leha ho le joalo.

²⁹⁹ Joale, u re, “Be, Moena Branham, haeba ke fetoha Mokreste, nka etsa sohle seo ke se batlang?” Ehlile bo. Ha u le Mokreste, etsa sohle seo u se batlang. 'Me ke tla u tiisetša, u ke ke ua lakatsa ho etsa letho le phoso. Etsa eng le eng. Esale ke etsa seo ke se batlileng. Efèla ha ke sebeletsa Morena hoba ke tšaba ho ea lihleleng, ha ke Mo sebeletse ka tšoanelo. Efèla ha ke phelela mohatsa ka ka botšepeli hoba ke tšaba a tla ntlhala, ha ke monna ea lokileng hle. Empa ha ke batle ho mo khopisa ka letho, kaha ke mo rata.

³⁰⁰ Ho joalo le ka Kreste, ha motho a tsoetsoe ke Moea oa Molimo. E seng ka hoba a hlabile litlatse, a buile ka lipuo, kapa maikutlo a itseng; empa ka pelōng ea hae, lerato lea kena le tlatsa malulo a lefatše. Kea u bolella, o a Mo rata. O tsamaea pela Oona, letsatsi ka leng. Ha u a tlameha ho mo bolella, “Ho phoso ho etsa sena, kapa *sane*, kapa se *seng*.” O e tseba e le phoso. 'Me, o a tsamaea, ke sehlahisoa se tlostitsoeng sa mohau oa boithatelo ba Molimo. Ka nèpo.

Hobane bao ba seng ba kile ba bonesetsoa, . . . ba filoeng kabelo . . . pitsong ea leholimo . . .

Joale, esale re lumetse ho thoe motho ea kileng a bonasetsoa eaba o boela a oa, empa Bibehe ha e baloe joalo. “Ha se taba e ka etsoang ho motho,” mona o a bua, “ea amohetseng Moea o Halalelang, ho oa le ka mohla.” Joale e bale u fumane haeba e sa loka. Sheba mona, nka mohlolithero oo, mohlolithero kaofela, le likahare, thero, ke rialo.

301 Joale o qala a bua mabapi le hoo, ke eng? “Ha re feteleng kholong e tletseng.” Joale, o itse, “E seng linthong tsa nama, ho bea motheo oa lithuto mona le kolobetso le lihlabollo, le tse joalo. Re se etse hoo. Ha re feteleng kholong e tletseng.” Sehloho ke *phetheho*, 'me phetheho e tlišoa ke Krete. 'Me ebe re kena joang ka ho Krete? Ka ho ingolisa le kereke? “Ka Moea o le mong re kolobeletsoa bohle 'Meleng o le mong.” E seng ka: ho hong, ho kena ka ho bua ka leleme; ho hong, ho kena ka ho tsukutla letsoho; ho hong, ho kena ka kolobetso ea metsi. “Empa ka Moea o le mong re kolobeletsoe 'Meleng o le mong.” Lea e tšoara? Ke eona phetheho.

302 'Me ha u kena kahara Hoo, u ka ho Krete, 'me lefatše le shoale ho uena. 'Me u tsamaea le Konyana letsatsi ka leng, 'me metsamao ea hao e laoloa ke Molimo, hore ho etsoeng. Oh, re feta liteko le lihlahlobo tse kakang! U re, “Na u a lekoa?” E, monghali. Ebe ke eng. . .

303 Mohau ke seo Molimo a nketselitseng sona, mesebetsi ke seo ke se etsetsang Molimo. Joale, ba tlil'o thea thuto ka eona, ba hopola mesebetsi e u hlolela menyetla. Ha ho le joalo, ha se neo e tlišeng feela. Mohau ke seo Molimo a le etselitseng sona, “Le bolokehile ka mohau.” 'Me mesebetsi o e etsa ka kananelo ea mohau A u hlahiselitseng oona. 'Me ha u Mo rata, u rata ho etsa mesebetsi ea Morena. Ruri, hobane, ka hona, u—u a Mo rata.

304 Ho amohela Meda Broy, e le mohatsa ka, ke seo lerato le mo etselitseng sona. Seo a se etsang, ka kananelo: ke mosali ea lokileng, o lula hae, o hlokomela bana, 'me o phela bophelo ba makhonthe. Ha se hoba re sa nyalana; re nyalane. Empa o etsa hoo ka baka la likananelo. Haeba a mathela toropong, letsatsi ka leng, a kena levenkeleng ka leng la khale, le holimo-le-tlase literateng, 'me a sa hlatsoe lijana le ka mohla, kapa le letho, re sa ntse re nyalane. Ruri. Mohla ke ne ke nka kano ea ka, eaba ke phetho. Ke mohatsa ka. Ha feela bophelo bo le teng ka ho rōna, ke mohatsa ka. Ke kano ea hae eo. Empa kananelo eo a e etsetsang hoo: o lula hae, le ho hlokomela bana, le ho leka ho ba mohatsa sebele.

305 Nka liila hohle kantle ka lula ke ile, ho tsamaeaka hohle naheng, ke mo siile a bolaoa ke tlala, kapa le letho, ho siea bana ba sa je letho; re sa ntse re nyalane. Lehla a ka ntlhala, ke sa ntse ke nyetse, ha feela bophelo bo sa setse 'meleng oa ka. Ke nkile kano, “Re tla arohangoa ke lefu.” Ke hantle. Re

sa nyalane. Empa, koana, haeba ke bile monna e mobe. Le eëna e tla ba mohatsa e mobe. Ka hona haeba re ratana, rea khomarelana 'me re jara boima, 'moho.

³⁰⁶ Molimo le Kereke ea Oona ba joalo. Ha u tsoalloa 'Musung oa Molimo, u tla kopana le *meepa* le *metheo*, ruri, empa u sa le Mokreste, u sa ntse u tsoetsoe ke Moea oa Molimo. Molimo a ka tlameha ho o tlosa lefatšeng pejana ho nako.

...bao ba seng ba kile ba bonesetsoa, ba latsoitseng...neo ea leholimo,...

...hore ba ka oa, ha ho kamoo ba ka boela ba inchafatsa kateng hore ba boele ba bake;...

³⁰⁷ Joale, ke tseba seo le se hopotseng, kereke. Ha nke ke le tiise ka matla nakoana, hore e—e boramolao ba tle ba koaloe molomo. Ha re feteleng koana ho Baheberu, khaolo ea 10, re shebe sena nakoana.

³⁰⁸ Khaolo ea 10, temana ea 26.

Hobane ekare ha re etsa sebe ka boomo ha re...filoe tsebo ea 'nete, ha ho sa le sehlabelo se seng sa sebe,

E se e mpa e le tebello e tšabehang...kahlolo le bohale ba mollo, o tlang ho ja mohanyetsi.

Ea neng a nyelisa molao oa Moshe o ne a bolaoa ho se mohau ka polelo ea lipaki tse peli leha li le tharo:

Ha le bona eo, leha ho thoe...leha ho lekanngoa,... hatikela ona...ea hataketseng Mora Molimo ka maoto, ea entseng mali a selekane ao a hlatsoitsoeng ka oona, ntho feela,...nyefotseng mesebetsi ea mohau, eëna ho tla lekanngoa hoba o tšoaneloa ke kotlo e kholo hakakang?

³⁰⁹ Joale u re, “U re'ng ka taba eo, Moena Branham? E shebeha joang?”

Joale, ho bala feela, ke nahana, “Lengolo ha le bolele *joalo*.” Ha e bue ka Mokreste. E bua ka motho ea utloileng Lentsoe eaba o a Le furalla. Ua bona?

Hobane ekare ha re etsa sebe...(sebe ke'ng? Ho se lumele.)...ha re sa lumele ka boomo ha re se re reretsoe evangeli, ha ho sa le sehlabelo se seng sa sebe,

³¹⁰ Sebe ke'ng? Ho se lumele. Bala Mohalaleli Johanne, khaolo ea 4. Jesu o boletse, “Ea sa lumeleng o se a ahlotsoe.” Sebe ha se ho tsuba, ho noa, ho feba. O etsa hoo hoba u le mosalumele. Tseo e mpa e le litholoana feela. O etsa hoo hoba u le mosalumele. Ho khaotsa ho tsuba feela, ho khaotsa ho noa, le lintho tse kang tseo, hoo ha ho u tlalehe u—u le Mokreste. Ke litholoana tsa tšokoloho ea hao feela. Empa, u ka khona, ua etsa life tsa lintho tseo, u ntse u se joalo.

³¹¹ Joale le ele hloko.

. . . ea sa lumeleng *ka boomo ha a se a filoe* . . .

312 E seng—e seng, “Hoba a amohela Krete pelōng ea hae.” Bibehe ha e rialo. Ho itsoe, “Eo ea . . .”

. . . *ha re etsa sebe ka boomo*, ho se lumele ka boomo, *ha re . . . filoe tsebo ea 'nete*, . . .

Lea e tšoara? E ne e sa bue le Mokreste, ho hang.

313 Mosali e mong o tšile ho 'na, nakoana e fetileng, a re, “Moena Branham, ke Mokreste, empa ke nyefotse Moea o Halalelang.”

314 Ka re, “Ha se ntho e ka etsoang eo.” Mokreste a ke ke a nyefola Moea o Halalelang. U ke ke ua khona. Moea oa Mokreste o pakelana le Moea oa Krete. Ua bona? 'Me u tla bitsa, sohle sa Molimo, “sa Molimo.”

315 Empa ha u ruile mohopolo oa nama, u tla soma 'me u tsehe Moea o Halalelang; ha ke tsotelle u tsamaea kereke hakae, u sa le moetsalibe, 'me u nyefola Moea o Halalelang. Enereha ba bona Jesu a senola mehopolo ea bona, ba itse E ne e le “senohe-ramahlohonolo.”

316 Jesu a re, “Le se le . . . Ke tla le tšoarela hona, empa mohla Moea o Halalelang a tšileng, ho bua lentsoe khahlano le Oona, le ke ke la tšoareloa hona.”

Hobane, ba itse, “O na le moea o sa hloekang,” hoo ke ho bitsa Moea oa Molimo, “ntho e sa hloekang.”

Mokreste a ke ke a etsa hoo. Kamehla Mokreste o tla bitsa Moea oa Molimo, “ho Loka.” Ua bona? Mokreste a ke ke a nyefola Moea o Halalelang. Ea kantle ke eèna ea nyefolang.

317 E ne e se Bakreste ba emeng mono. E ne e le batho ba tletseng borapeli, e ne e le Bajuda ba moetlo, lingaka tsa thutakhalalelo, le ba joalo, 'me keha ba Mo soma le eona mesebetsi ea Hae, ba bitsa mesebetsi ea Molimo, ho thoe, “E ne e etsoa ke moea o sa hloekang.”

318 'Me u nahana Moea o Halalelang o nyefoloa ke ba bakae kajeno, e leng ba tšoereng D.D.D., Ph.D. holima lebitso la bona? Ke baholo ba bakae, Borameetlo ba hoammeng, Makatolike, Maprotestanta, ba tsamaeang literateng 'me ba tšehisa ka tšebetso ea Moea o Halalelang, e le baithuti ba bentšitsoeng, ba le boreleli ba konopo? Ke hantle. Empa ba soma ka Moea o Halalelang, 'me ka baka leo ba O nyefola.

Empa Mokreste ea tsoetsoeng labobeli a ke ke a etsa hoo. O tla re, “Eo ke moena oa heso. Oo ke Moea oa Molimo o phelang.” Ke hantle. Mokreste a ke ke a nyefola Moea o Halalelang.

319 Moetsalibe ke eèna ea nyefolang Moea o Halalelang; mosalumele, eèna *moetsalibe*, e leng “mosalumele.” Lintho li peli feela: u molumeli, kapa u mosalumele.

320 Joale, ela hloko mona, morero ke ho tinketsa taba ena ka thata joale. Ke bone pono e sa le e ntlhopho. E se e le lilemo ke beile taba eo leihlo. Ka re, “Oh, efèla hang ha motho a amohetse Moea o Halalelang, a ntano oa mohaung, o tla lahleha kamehla.” Feela ke sa khone ho nyalanya taba ena ho etsa kelello le eane.

321 Ka re, “Ebe hore’ng Bibe e itsalo, ho thoe, ‘Ea utloang Mantsoe a Ka ’me a lumela ho Ea Nthomileng o na le Bophelo Bosafeleng, Bosafeleng, ’me a ke ke a tla kahlolong, empa o tlohile lefung ho kena Bophelong. Bohle bao Ntate a ’Neileng bona ba tla tla ho ’Na, ’me ha ho le a mong oa bona ea timelang, Ke tla ba tsosa matsatsing a qetelo. Ha ho ea ka ba utlang letsolong la Ka?’ Ebe hoo ho nyalana joang le hona? Ke sa e utloisise feela, ‘Ha ho kamoo ba kileng ba bonesetsoa.’” Ka nahana, “Phoso e teng. Ke mpa ke sa e tšoare.”

’Me eaba ke etela kopanyana ea Pentekosta, lilemo tse fetileng.

322 Ha ho a sala le a mong kahara kereke, kea kholoa, bosiuang bona, ea hopolang. Lilemo tse fetileng, e batla e le mohla tabernakele e ne e hahuhoa. Ntle, le Moena Graham morao mane, kapa motho e mong. Ha ke tsebe, u ne u fihle mona pele, kapa che, baena. Moena Mahoney, kea nahana, e ne e le eëna. Yaa, ke pajana ke nyala.

323 Neo e sebetsang eo, keha ke e tšaba. Ba itse e ne e le ea liabolosi. He kea tseba haese hofihlela Lengeloi la Morena le mpoleletse.

324 Ka etela Mishawaka, ’me ka lula kopanong eo, ’me ke eso utloe litlatse tse kaalo le lillo le thoriso ho Molimo. Ka nahana, “Moena, lena ke Leholimo.” ’Me, oh, ba hlile ba tsamaea ba leba holimo-le-tlase.

325 Ba ne ba tlameha ho e tšoarella ka Leboea, ka baka la khethollo. Bammala le ba basoeu keha ba le ’moho. Ba P.A. ea W. le ba P.A. ea J.C. keha ba hlile ba matahane ba iphetotse United Pentecostal. Empa ba hlile ba makhile tsoeletso ea tonana, mono tabernakeleng ea Moena Rowe koana Mishawaka. ’Me ’na, ke batla ke le mothaka ea hlahlobang lintho, ke lutse setulong se ka morao, ke shebeletse hona hohle. Ke eso bone lintho tsena pele.

326 Mona keha ho lutse monna . . . Ha ke eso e phethe pontšeng pele. Monna o ne a lutse lehlakoreng le leng, le monna ho le leng, ’me e mong a bua ka lipuo, ’me e mong a e fetola. ’Me ba bolele lintho tse fapaneng tse tla hlaha. Ebe, *enoa* o bua ka lipuo, ’me *eane* a fetole. Ka nahana, “Khele, na ha e babatsehe!” Ka nahana, “Ho tlotleha hakakang! E tšoanetse e be e le Mangeloi, a theohileng ka sebopelo sa batho.”

327 Be, ke ne ke tšoere dolara le lisente tse mashome a supileng a metso e mehlano, ho khutlela hae hape, ’me nka—nka—nka reka

tanka ea mafura feela. Ka robala tšimong ea koro bosiu boo. Ke ngotse karolo ea eona bukeng, empa ha se eona kaofela, kaha ke ne ke sa batle ho thonkha maikutlo a bona. 'Me ka hona, bosiu boo, ba re, "Bareri bohle ba tle kalaneng." Ke ne ke le holima kalana. Ke le moreri e mocha ho fetisa mono mohlang oo.

³²⁸ Ka hona, hoseng ho latelang, ba nkopa ho tla rera. Ka ipata. U a tseba, monna oa bammala a re, "Ke enoa mona." Le hopola pale ea eona, mohla ke lutseng mono 'me a mpepesa.

³²⁹ Ka hona hoba ke rere tsatsing leo, ke ntse ke itsamaela, ka nahana "Ha nka kopana le banna ba babeli bao." Ba ne ba eteletse kopano pele. E mong o ne a ema a soeufale sefahleho; ebe o bua ka puo. 'Me e mong a e fetole, a ntše mantsoe, "HO RIALO MORENA, 'Motho *sekete-kete* o teng mona, ea bitsoang *sekete-kete*, ea tlamehang ho etsa *senā* le *hore-le-hore*.'" Moena, e ne e le 'nete. Le e mong a eme a bue ka lipuo, 'me a fetole.

³³⁰ Ka nahana, "Oh, khili, na ho babatsehe!" Ka hona, tsatsing leo, ka nahana, ka tsoa ka ea rapela. Ka nahana, "Morena, ke U kopa ho nketsetsa hoo hape." Ke sa tsebe hore lipono, nka e bitsang.

³³¹ Ka tsoa ka ea rapela, ka kopa Morena ho nthusa. Ka potela ka mohaho, ka re ptjang-ptjang le e mong oa bona. Joale, Morena o mphile mokhoa oa ho tseba lintho. Ka tsukutla letsoho la hae. Ka re, "U phela joang?"

A re, "U phela joang? Lebitso la hao u mang?"

'Me ka re, "Branham."

"Oh," a re, "ke uena thaka le rerileng hoseng hona."

Ka re, "E, monghali."

³³² Eitseha ke qoqa le eèna, ka qhautsa moea oa hae. 'Me e le Mokreste oa makhonthe, Mokreste ea se nang sekoli, moena. Ke re, e ne e le molumeli. Ka nahana, "Oh, na ha e babatsehe!"

³³³ 'Me hora ho tloha moo, kantle mono pel'a koloi, holima koloi e kholo ea tonana, e nang le "Jesu Feela" ka morao ho eona, kantle mono keha ho eme monna e mong. Eaba ke tsoa ke re, "U phela joang, monghali?"

³³⁴ A re, "U phela joang?" Ho re, "U Moena Branham, ea buileng hoseng hona."

³³⁵ Ka re, "E, monghali. Ke 'na." Ka re, "Khele, ke thabela neo tse kholo tseo Molimo o li sebelisang holima lona baena ba babeli."

³³⁶ A re, "Kea u leboha, Mongh. Branham." Eaba ke qala ke utloa moea oa hae. Pono ea hlaha. 'Me haeba nkile ka qoqa le moikaketsi, e ne e le e mong oa bona. Mohatsa'e e ne e le mosali ea hloho e tšoana. O ne a phela le mosali ea hloho e tšehla, a tsoetsoe bana ba baeli ka eèna. E ne e se Mokreste oa letho lefatšeng.

337 Eaba ke re, “Ebe ke kene kahara eng? Ke itse ke hara Mangeloi, ’me joale ke tšoanetse ke be ke le hara batemona. Ntho e ’ngoe e hlahile. E mong e ne e le enoa, Mokreste oa makhonthe; athe oona Moea o tšolohelang holima monna enoa, o no o tšolohela holima monna enoa.” Ka re, “Joale ke ferekane ka botlalo.” Ke sa tsebe ke etse’ng na. Ka hooeletsa ’me ka kopa, ho Morena. Ke sa tsebe seo nka se amohelang.

338 Ba se ba tla re ke . . . Ho mpotsa haeba ke “amohetse Moea o Halalelang na?” thaka lena le entse hoo. ’Me ka re, “Che, monghali, e seng kamoo le u o fumaneng.”

Ho re, “U bua ka lipuo le ka mohla?”

Ka re, “Che, monghali.”

Ho re, “Etlaba ha o na Oona.”

339 Ka hona ka re, “Koana u ka be u nèpile, moena oa ka. Ekaba ha ke na oona, hoba ha ke na seo le nang le sona.” ’Me ka mora nakoana, ka thaba ha ke sa etsa joalo.

340 Eaba ke sheba taba eo, ’me ka e bona kamoo e tsamaeang.

341 Ka hona, tsatsi le leng, ha ke tsoile mona ho rapela, nakoana e fetileng. Ke tla le bolella lebaka, e le ha ke rapella mang, haese Roy Davis. ’Me ke ne ke tlile koano mona ho rapela, kaha a ne a mpitsitse “khabulubulu,” ’me ke rapela Molimo ho mo tsoarela eona. ’Me morao mono a hlomme mochini o hatisang, a ngotse pampiri. Eaba mochini o hatisang oo o tuka o cha lore, masiu a ’maloa kamora moo, ba sa o mathisa.

342 Eaba ke eme motšeo mono lehaeng la khale ka morao ho Lelala Green. Ka tsoa ka mono. ’Me ke ne ke rapela, esale ke khohletse motšeo mono, matsatsi a mabeli. Ka bea Bibe le holima sekoqo, mono, ke ile ka bontša Moena Wood, nakoana a fetileng, ka bea Bibe le ea ka fatše. Ka lula holima sekoqo seo ke se kaletse. Eaba moea o a foka. Ka nahana, “E se e le nako e telele, ke khohletse lehaeng leo, ke tla bala nakoana.” Eaba ke nka Bibe le ’me ka qala ka bala, ’me e le eona khaolo ena. Be, ka qala ka bala, ’me ka qala ka ipotsa nakong eo. Ua bona?

Hobane ba seng ba kile ba bonesetsoa, . . . ba filoeng kabelo Moeeng o Mokhethoa,

. . . ba latsoitseng lentsoe le monate la Molimo, le . . . bophelo bo tlang ho tla,

Bao ha ba ka oa, ha ho kamoo ba ka boela ba inchafatsa kateng . . . ho bake; hobane bao ba boela ba ithakhisetsa Mora Molimo, ba mo etsetsa nyeliso.

343 Ka nahana, “Lengolo leo ke leo.” Empa eaba ntho e a nkhomarela. Ka qala ka nahana, “Morao mona o buile hape, tšimolohong, ‘Re se boele ra bea motheo oa mosebetsi o shoeleng oa pako, tšimolohong. Re se boele ra bea motheo oa pako,’ hape

mona o re, 'Bocha, ho inchafatsa hore ba boele ba bake. Empa ha re feteleng phethehong, lintho tsena re li sisee morao.'" Eaba ke qala ke bala. Ka ntano bala temana e latelang.

Hobane haele lefatše le inoellang metsi a lipula tse le nelang hangata, le melisetsang bao le lemeloang bona meroho e molemo, lefatše le joalo le ee le fuoe mahlohonolo ke Molimo:

Empa haele le melisang meutloa le libajoa feela lona le ee le lahloe, le okameloe ke thohako; 'me taba ea lona ea qetello ke ho chesoa.

344 'Me eitseha ke bala taba eo, ka tsukutloa ke ho Hong. 'Me ka nahana, "Morena, taba eo ha e amane le Roy Davis. Hobaneng U ka etsa joalo?"

345 Ka simolla, ka phetla lehlaku le leng. Ka tlameha ho Le khutlela, hape, "Ha ho kamoo bao ba seng ba kile ba bonasetsoa," ka boela ka Le bala.

346 Eaba kea nahana, "Morena, hona ke'ng? Ebe U bolela'ng, Morena?"

347 'Me ka phetla 'me ka khutlela lehaheng la ka hape, ho rapela mabapi le Lona. 'Me hoba ke etse hoo, ka bona lefatše le phethohang. Le hlile le le boleme, hamonate feela, lefatše lohle. 'Me ka bona monna ea apereng bosoeu, a ntse a potoloha, a tšoere khetsi letsohong la hae. A ntse a jala lipeō ha a potoloha. A potela ka kobamo ea lefatše. 'Me hang hoba a nyamelle, mona ha hlaha monna ea apereng liaparo tse botšo bo tiileng, e le thellanyane ea mothaka, a nanara ka mokhoa oona, a shebile. 'Me a tšoere peō. 'Me a lahlela ntho ka morao ho eona, ha a potella ka lefatše; a shebile mang le mang 'me a ntse a hasa. Ka ema 'me ka shebella pono.

348 Hoba a tsamaee, lefatše la phikoloha, 'me teng ha hlaha sejalo se sehlo, sa setonana, 'me sona e le koro. Eaba ho hlaha le mahola, lihlabahlabane le lintho kahara koro.

349 Ha fihla komello. 'Me, oh, koro e nyenyane eo ea hla ea kebisa hlohoana ea eona, e nyoretsoe metsi. Hlabahlabane e nyenyane e ne e kebisitse hloho ea eona, 'me e nyoretsoe metsi. Mang le mang o ne a rapella pula. 'Me kamorao ho nakoana, ha fihla leru le lehlo la hla la nosetsa lefatše lohle. 'Me hlabahlabane e nyenyane ea qhoma, ea qala ea hlaba litlatse, "Khanya ho Molimo! Alleluia! Ho bokoe Morena!"

350 'Me koro e nyenyane, ea qhoma, e qala e hlaba litlatse, "Khanya ho Molimo! Ho bokoe Morena!"

351 Eaba Lengolo lea mphihlela, lona le fumanoa Bukeng ea Mattheu, khaolo ea 5 le temana ea 45. 'Me le mamela seo Jesu a se buileng, ho Mattheu 5:45. 'Me le mamele ka kelohloko joale re sa bala. Mattheu, khaolo ea 5 le temana ea 45, 46; ea 44, ho qalisa.

Empa 'na ke re ho lona, Ratang bao e leng lira ho lona, le hlohonolofatse ba le rohakang, 'me le etse hantle ba le hloileng, le rapelle ba le tsohelang matla, le ba le hlorisang;

Le tle le be...pitso...le be bana ba Ntata lona ea maholimong: hobane o chabisetsa...babe le...batle letsatsi la hae, 'me o nesetsa ba lokileng...ba khopo.

352 Ka hona, ua bona, eona pula e melisang koro, e melisa hlabahlabane. 'Me, ka baka leo, eaba ke fumane setšoantšo. Moipoleli oa hao oa nama ke eo, ea leng kahara kereke hantle. Empa litholoana tsa hae...A ka hlaba litlatse, a qhomaka, a hobela, a bua ka lipuo; empa litholoana tsa hae: ke hlabahlabane. Athe e mong o teng, ea ruileng Moea ona oo. Moea o Halalelang o ka theohela hantle hara sehlopha sa batho, 'me moikaketsi a ka hooeletsa, ka Moea o Halalelang, joaloka hlabahlabane e ka phelang ka eona pula e romeloang. Ke seo Pauluse a buang ka sona mona. Empa ha ho kamoo hlabahlabane e ka fetoha koro, kapa koro ea fetoha hlabahlabane. Lea e tšoara? [Phutheho e re, "Amen."—Mong.]

Hobane haele ba seng ba kile ba bonesetsoa hang, ba lekileng...nkile kabelo neong ea Moea o Halalelang,

'Me...ba latsoitseng lentsoe le monate la Molimo, le matla a lefatše le tlang,

...ho oa, ho boela ba inchafatsa...

Mamela seo a se buileng.

...kahobane lefatše le inoellang metsi a pula tse...nelang hangata, ho le nosetsa le ho le apesa mona, le ho le lokisa;

Empa...le meutloa le litšehlo lona le ee le lahloe;...

Joale, ka baka leo ha re feteng mebuso le lithuto tsa Kreste, 'me re feteleng...nqa kholoe tletseng; re se boele ra thea motheo oa ho baka le mesebetsing e shoeleng...ho Molimo, le tumelo, le lintho tseo,

...le lithuto le likolobetso,...lipeo tsa matsoho, le lintho;...

353 Ua bona, molumeli oa nama, morao matsatsing ao, ho tšoana le kajeno, ba rata ho re, "Be, ke setho sa kereke. Ke bakile. Ke—ke a nyoloha, kea ipolela. Ke kolobelitsoe." Ua bona, ba thea lihlabollo tseo tsa nama. 'Me hoo ho etsa'ng? Ho hlahisa lihlabahlabane.

354 Ebe phetheho e etsa'ng? Ke koro. Koro ke Lentsoe la Molimo. O e sebelisa joaloka Lentsoe la Hae. Ke Peō. E a mela.

355 E itšetlehile holima peō e jetsoeng pelōng ea hao. Ha u tla kerekeng hoba u tšaba lihele, ha u ingolisa le kereke kaha u sa batle—u sa batle ho ea liheleng, u sa le hlabahlabane.

Ha u—ha u ingolisa le kereke ka baka la botumo feela, u sa le hlabahlabane. Ha u entse lintho tsena tsohle tse fōfō tse tlamehang ho etsoa, 'me e le phetho seo u se tšoereng, u sa ntse u le hlabahlabane.

356 Empa Mokreste oa sebele, oa makhonthe o hatella ka matla phethehong lefatše le be le shoe ho uena 'me u fetoha 'mopuo e mocha ka ho Krete Jesu. Ka hona, ha ho kamoo motho eo a ka oang kateng. Seo Bibe e se buileng! Le bona kamoo e bapang le Lengolo lohle? Le bona kamoo Le khohlelang ka nēpo malulong a lona?

357 Mona E ka rialo joang, “Motho ea kileng a bolokeha a ke ke a lahleha le ka mohla” ebe mona e tla e re, “Empa, haeba u lahleha, kapa u nyefola, ha ho kamoo”? Ehlile, haeba u le monyefoli, ha u Mokreste.

358 “Ha ho motho, ea buang ka Moea oa Molimo, ea ka bitsang Jesu thohako.” Mohalaleli Johanne 4. . . kapa Johanne oa Pele 4. Ha ho motho ea buang ka Moea oa Krete, ea ka bitsang Jesu “thohako.” Moea o mong le o mong, e leng oa Molimo, o ka hara Kereke ea Bokreste, o lumelana le sohle seo Molimo o se boletseng.

359 Mona rea bala, 'me ho thoe, “Athe O hlabetsoe makhopo a rōna. Re folisitsoe ka maqeba a Hae.”

360 Mohopolo oa khale oa nama o re, “Matsatsi a mehlolo a fetile. 'Na ke *Ngk. Jones*.” Ua bona? “Ntho e kang pholiso ea Khalalelo ha e eo. Ha ho ntho e kang borapeli bo pelonolo. Le sehlopha se fehliloeng feela. Le aparetsoe ke maikutlo. Ua bona, ke phetho se leng teng. Ha ho letho ho eona. Rōna re Mapresbeteriene. Rōna re Maluthere,” kapa e ka bang eng. “Re tseba moo re emeng teng.”

361 Empa Moea oa Molimo o reng? Jesu Krete, o sa tšoana mona! “Amen,” Moea oa Molimo o rialo. O lumelana le Lentsoe ka potlako. E, monghali. E mono hantle. Le bona seo ke se bolelang joale?

362 “Lihlabollo tsena tsa nama ke mesebetsi ea lefu,” Pauluse o itsalo.

363 Empa Bophelo ha bo fihla, phetheho ena, “Ea utloang Mantsoe a Kā, a lumela ho Ea Nthomileng, o na le Bophelo ba kamehla, 'me a ke ke a tla tsuong, empa o tlohile lefung ho kena Bophelong. Ke tla mo nea Bophelo ba kamehla, a tsose matsatsing a bofelo. Bohle bao Ntate a 'Neileng bona ba tla tla ho 'Na, 'me ha ho lea mong oa bona ea lahlehang.” Hase ntho e ka etsoang.

364 Ka hona, ke sena seo e se etsang—e se etsang. Batho ba e hopola e hlepisa batho. Moena, ha u sebeletse Molimo tlasa noha e finneng phatla. Molimo ha o tsamaee hohle o kokositse

sephali sa noha e ntšo, a ntse a u khanna. Ke Ntate. Ke Lerato. Molimo ke Lerato. 'Me Bibeletse e boletse, ho Mohalaleli Johanne, "Ea ratang ke oa Molimo."

³⁶⁵ U rata Molimo. Nke ke ka khona, hola nka tsoa 'me—'me ka taho bosiung bona. Ha ke eso noe, bophelong ba ka. Empa ha nka tsoa ka taho, nke ke ka tšaba ho shapuo. Hase lona lebaka leo ke sa eeng—eeng, ke sa etseng hoo. Lebaka leo ke sa etseng hoo, ke hobane ke Mo rata. O a nthata. Hase ka mesebetsi ea molao. Hase ntho eo ke tlamehang ho e etsa. Ke kahobane A se a nketselitse ho hong, 'me ke Mo ka lebaka leo. Ke lona bao.

³⁶⁶ Ka hona, ha Moea oo o ahile ka hare ka mono, e leng oa pallo, "Na Ke mo ena Bophelo ba kamehla, 'me ba ke ke ba lahleha le ka mohla." Ebe O buile leshano kapa ebe O buile 'Nete? O buile 'Nete. Ka hona, na le bona hlaloso ea Eona? Motho a ke ke a oa ka mora ho kena mohaung. A ke ke a khona. A ka oa, ehlile, empa e seng ho khutlela pakong, morao moo a ka boela a etsa mesebetsi ea khale.

³⁶⁷ Ka hona, uena ea hlehleng ho tloha tsoseletsong ho ea tsoseletsong, tulong e 'ngoe ho ea ho e 'ngoe, ana ha u ipone hobane ha u a tsitsa? Ha u a theoa. Joale, ruri. . . U re, "Moena Branham, ha ke tsebe haeba. . ." Ruri Molimo o ke ke oa mphatšebetso eo O e tšoereng, oa ba oa ntumella ho fanya. Hola e sa kholisoa ke Lengolo, ekabeba e fantse, empa Lengolo le e tšehetsang ke lena.

³⁶⁸ Kereke ha eso fose tulo. . . Batho ba tloha, ba ingolisa le kereke, ba ngangisana, ba loana, ba pheha khang, le—le ntho eohle, ba ntano iphelele bophelo ba nama ba mofuta ofe feela, "Oh, e, ke Mokreste."

³⁶⁹ Ke utloile maipolelo a mosali e mocha kajeno ea mpoleletseng monna oa hae a mathaka le monna. O ba hatile, libakeng tse ngata. 'Me mosali o re, "Ke batla ho u bolella, "Na ke Mokreste."

³⁷⁰ Shebang Jimmy Osborne ka mona, o rera ka ntle mona Sontaha hoseng; 'me o chaea boogie-woogie, o etsa rokonrolo le ntho eohle, hara veke.

³⁷¹ Shebang Elvis Presley, sekai sa Judase Iskariota oa 1947, o ingolisa le Assemblies of God, Pentekosta, o bua ka lipuo e le Moea o Halalelang, athe o romela meea e mengata hloko fatsong ho feta litamene tsohle tse theiloeng lilemo tse mashome a mahlano tse fetileng. O khopamisitse likello tsa chacha e ncha lefatšeng lohle, hoo bananyana ba rutlang liaparo tsa bona tsa kahare ba li lahlele kalaneng, hore a li tekene otografo. Ho silafala hoo thelebishene e sa mo hlalohang, ho qala letheke la hae ho ea tlase, boitšoarobu ba 'mele oa hae. Moea o Halalelang, o buang ka lipuo, e le bopaki? Oh, moena, hola Moea o Halalelang o le teng, O ka be o sa etse hoo. Le tseba hantle ho feta moo. Ruri ha ho joalo. Molimo o rata bohloeki le hloeko le khalalelo.

372 Ha ke itšoare ka bohloeki le ka ho hloka sekoli le ka khalalelo ho iphetola Mokreste. Empa ke Kreste, ka ho 'na, ea phelang hoo ka ho 'na. 'Me kea Mo rata. 'Me ha nka etsa phoso efe, e nkahlola, hona moo. Ke re, "Molimo, ntšoarele." Letsatsi ka leng, ke tlameha ho kopa tšoarello, letsatsi ka leng. Le uena, u etsa joalo. Ruri, u etsa joalo.

373 Empa joale haeba u—haeba u le nameng, u chechella morao feela, u re, "Ah, be, hoo ho itoketse, ke setho sa kereke." Ua bona? 'Me ha u nyefola, keha u sa rua Tumelo e kileng ea fuoa bahalaleli. Ebe u soma ka Hoo, 'me u E bitsa, "Moea o litšila." Ho re, "Ke mphi ea bathethehi ba halalalang." Ha ho le joalo, u ikarola lipakeng tsa mohau le kahlolo, ebe ho felile ka uena kamehla.

374 Jesu o itse, "Lentsoe le le leng khahlano le Oona, le ke le la tšoarello lefatšeng lena kapa lefatšeng le tlang ho tla." 'Me Mokreste, ea tsoetseng ke Moea, a ke ke a bua hampe ka Hoo, hoba e ke ke ea etsoa. E lumellana le Eona. Ke hantle.

375 Ke kahoo batho ba lehang ho mpoella, ho thoe Topallo ea Mollo mono, e iponahatsang le rōna mona, ba leka ho bolela, ba re, "E ne e le liabolosi," hoo, "E ne e le qhakanyetso," hona hohle. Empa khamera e khohisitse E ne e se joalo. Le mesebetsi e robetse hantle kahara Bibe, eona Topallo ea Mollo e kopaneng le Pauluse tseleng ea hae e eang Damaseka. Lintho tsena tsohle tseo A li entseng morao mane, li etsoa ka ho tšoana hantle, ho latela Bibe. Ke Kreste, Mora Molimo.

376 'Me ha re tsoaloa labobeli, re ruile Bophelo ba kamehla, 'me re ke ke ra timela. Ha ho kamoo motho a ka oang. Ke seo Bibe e se boletseng.

377 Joale, mamelang, elang hloko seo Pauluse a se buang. Ke tla le bala kaofela, le ho bona haeba e sa utloahale hantle, joale. Ha re feteleng pele, motsotso feela. Temana ea 8.

Empa haele le melisang meutloa le libajoa feela lona le ee le lahloe, le okameloe ke thohako; 'me taba ea lona ea qetello ke ho chesoa. (Eo ke mosalumele.)

378 Joale elelloang Pauluse. "Empa, baratuoa, . . ." Joale o bua ka bao ba lehang ho khutla ba kena tlasa molao, u a tseba, ba lehang ho hlakisa mesebetsi eohle ea molao, ba tiisetša meetlo ka bokhoni ba bona. Ba boloka likolobetso le lipeo tsa matsoho, le lintho tsena tsohle.

Empa leha re bua joalo haele bakeng sa lona, baratuoa, re tšepile tse fetisang tseo, . . .

Ke lona bao. Mo mamelang joale.

. . .ka botle tse tšoanelang poloko, leha—leha re buile ka sena joalo.

Hobane Molimo ha o khopo o ke ke oa lebala mesebetsi ea lona le kamoo lerato la lona le sebelitseng kateng, ka lebaka la lebitso la oona, ha le babaletse bahalaleli, le joale le sa ba baballa.

379 Le bona seo A buang ka sona? Ha A bue ka Bakreste ba ngalang, ba sa khone ho khutla. O bua ka balumeli ba nama ba hlakisang libopeho tsa hlabollo. “Empa,” o itse, “haele lona ba tsoetsoeng labobeli, lona Bakreste, baratua, re tšepile tse fetisang tseo ka botle. Ha le bue lintho tseo. Ha le phele bophelo ba mofuta oo. Le sirelelitsoe ka ho Kreste.”

Morao mona o itseng? Joale ha re feteleng ho Baheberu 10, moo re tsoang teng hoseng hona, hape. [Sekheo lebanteng—Mong.]

380 Joale ha re phetleng koana, hape, ho Baefese 4:30. 'Me ha re fumaneng sena, motsotso feela, re shebe seo se se buang, ho tšehetsa sena, ho tlamanya Lengolo le Lengolo. Baefese 4, ha re boneng. Baefese 4:30. Ha re baleng 'me re bone seo E se buang. Mamelang.

...le se ke la soabisa Moea o halalelang oa Molimo,...

Huh? Re kolobeletsoa joang 'Meleng? Moea o le mong.

...le se ke la soabisa Moea o halalelang oa Molimo, oo le tšoaetsoeng ho fihlela letsatsi la topollo ke oona.

Ho joalo? [Phutheho e re, “Amen.”—Mong.] U tiiseletsoa ka hara 'Mele o Kreste, ka kolobetso ea Moea o Halalelang, ha se ho tloha tsoeletsong ho ea ho e 'ngoe, empa hofihlela Letsatsi la mmele oa topollo. Ke seo u leng sona. Ka hona, ha ho mokhoa ho uena ho lahleha.

381 U a tšoha. 'Me ke ka baka leo tšoho, tšoho, tšabo e khema le pelaelo.

Lerato le khema le tumelo. Ke rata Ntate oa ka. Ha ke Mo tšabe, kahobane ke Mo rata. A ke ke a ntša kotsi. O tla ntšebeletsa molemo. Holane kea Mo tšaba, 'me, “Oh, ha ke tsebe haeba A tla e etsa, kapa che.” Ua bona?

382 Empa hola kea Mo rata, “E, Ntate, ke—ke a U rata. 'Me ke tseba U—U le Ntate oa Ka, 'me U a nthata, 'me ha kea tšoha hore U tla boloka Lentsoe la Hao. Ke pallo ea Hao ho 'na.” Moea oa Molimo o sebetsa joalo.

383 “Empa, oh, haeba ke entse *sena*, haeba ke entse *sane*.” Ua bona, u oela lehlakoreng la molao, hape. U se ke ua oela lehlakoreng la molao le ka mohla. Lea nyahamisa.

384 Lehlakore la khahiso ke seo u se batlang. Ke mosebetsi o seng o phethiloe. Kreste o shoele, 'me sebe se shoele mohla A ne a eshoa. 'Me haeba Molimo a u reretse Bophelong Bosafeleng, “Bohle bao Ntate a 'Neileng bona, ba tla tla ho

'Na." Ke lona bao, a ke ke a lahleha. U sirelelitsoe kamehla. "Hoba ka Moea o le mong bohle re kolobeletsoa 'Meleng o le mong, 'me ka sehlabelo se le seng O phethisitse ka mehla." Ke uena eo. Ha ho mokhoa ho rōna ho lahleha. Ka nēpo. Joale, na ha e le thabise? [Phutheho e re, "Amen."—Mong.]

385 Joale, u tseba joang ha u le Mokreste? Ha moea oa hao o pakelana le Moea oa Hae, ha lerato la Molimo le kene pelōng ea hao, ha u na le lerato, thabo, khotso, mamello, mosa, tiisetso, molemo, bonolo. Ke mohla u . . . Litholoana tsa Moea li teetse bophelo ba hao hare.

386 Hase hoba u ka hobela Moeeng, oh, ho omēla morethetho ona oa sejoale, ho o fuluha ka piano, le khahlakhahla ena ea ho tantša Moeeng. Lintho tseo li itoketse. Empa ba falliselitse ntho eohle nqeng ea molao, ua bona, 'me ka baka leo, ba siile Moea oa Molimo morao.

387 Ke lona lebaka, ha Molimo o qala o Iponahatsa, ba itse, "Lithole. Ha re batle ho amana le Hoo ka letho." Ha ba tsebe Molimo. Ha ba eso E bone. Ha ba khone ho E utloisisa, hoba bophelo bo kahare ka mono bo fapane. Ha a tsebe . . . Hlabahlabane ha e tsebe seo koro e se etsang. Bophelo ba eona bo fapane.

388 Le Mokreste o joalo, nqa molumeli oa nama, moipoleli, ea tsoang a ipolela, "Oh, e, ke Mokreste." A momme sikarahali molomong oa hae, eka poho ea Texas e khorotsoeng lenaka.

389 Mosali ea apereng lishoto tsa hae, o re, "Oh, e, ke setho sa kereke. Ehlile, ke sona." Litholoana tsa hao li u paka u le nameng feela. Ke hantle. Ruri, ke eona. Ntho e lumellang hoo e 'ngoe to: ke khaello ea kelello kapa u arubelitsoe ke moea oa takatso. Ke hantle.

390 Ha u batla ho itšoara sefetatše, Bible e itse, "Ha u rata lefatše kapa lintho tsa lefatše, lerato la Molimo ha le eo ka ho uena." Ke lona bao.

391 Joale, u re, "Oh, Bible e itsalo, ke tšoanela ho etsa hoo." Che, hase eona. Lula mona ho fihlela Krete a u etselitse ho hong, ntho e ntšang hoo ka ho uena. Ebe moo u tsoaloang ke Moea oa Molimo. Hase ka seo u se etsang, ke ka seo A u etselitseng sona. Ho fihlela u fumana lerato le u tlalehang u tlohile lefung ho kena Bophelong. 'Me u ntano hlahloba bophelo ba hao, haeba bo—haeba bo ngomelana le hoo. E seng hoba u leka ho etsisa bophelo ba hao, empa ka hobane Molimo o u bea tlasa bolaoli ba Moea oa Hae. Hase uena ea itataisang tseleng ea Molimo. Ke Molimo o u tataisang tseleng ea Oona ka Sebele. Hase uena ea tsamaisang, empa ke Molimo o tsamaisang.

392 Joale shebang sena, joale, re sa atamela qetello. Temana ea 11.

Empa re rata hoba e mong le e mong a ka 'na a hlahisa cheseho eona eo ho isa qetellong:

Le tle le se be ba botsoa, le mpe le be balateli ba ba ruileng pallo ka tumelo le ka mamello.

393 Joale, hlahiso e le 'ngoe hape mona.

Hobane Molimo mohla o nong o etsetsa Abrahama pallo, kahobane ho ne ho se e mong ea o fetisang eo o neng o ka hlapanya ka eèna, o hlapantse ka oona,

O itse, Ruri ke tla u hlohonolofatsa ke be ke u hlohonolofatse, ke tla u atisa, ke be ke u atise.

394 Mohla Molimo o no o kopana le Abrahama! Joale, Abrahama o etselitsoe selekane, a sa ka a sebetsa letho. Selekane se entsoe le Abrahama. Ke mohau oa makhonthe oo, ka botlalo. Abrahama e ne e se monna ea lokileng. E ne e le monna oa khalalelo. E ne e le monna oa tloaelo feela. 'Me Molimo, ka khetho, o khethile Abrahama hoba Molimo a mo khethile; hase hoba Abrahama a e batlile, hobane Abrahama a entse *sena*, hobane e ne e le monna ea lokileng, kaha a entse botle bo itseng. Empa e ne e le khetho ea Molimo. Molimo o ile oa nka Abrahama.

395 Kajeno, kamoo ke boletseng, kea kholoa, “Re khetha bareri ba rōna.” Re tsamaea hohle, ho thoe, “Be, motikone e mong o lihetse. Ha re fumaneng monna ea khabane ka mohahong ho tlatsa malulo a hae. Be, molisa o lihetse; ha re fumaneng, re fumane ea khabane.” Ka linako tse ling ha e a loka.

396 Mohla ba ne ba khetha monna ea tlatsang malulo a Judase, ba thotse monna ea phoso. Ba thotse monna ea lokileng, Matthiase, mongoli e moholo, moithuti, modiplomate. Ba itse, “O tla tlatsa malulo a nèpileng. Moshana, ekare ke monna ea lokileng.” Empa keha e se khetho ea Molimo. 'Me o nlike monna enoa, koana ha a etsetsa Molimo letho.

397 Empa Molimo oa thola mothoana, ea mabifi a tlokomang, Mojude ea nko e khopo ea theohang mono. Sefahleho sa hae, sohle, “Ke tla theoha. Ke tla ba koalla.”

398 Molimo o itse, “Ke bona ho hong ka ho eèna. Ke tla mo sebelisa.”

399 'Me Molimo oa hlaha ho eèna, Leseli le leholo leo mono. 'Me o itse, “U Mang, Morena?”

400 Ha thoe, “Ke 'na Jesu. Khele, ho thata ho uena ho raha litsenene. U Ntlhorisetsa'ng na?” Ka mokhoa oo, eaba Molimo o nka monna ea *joalo* oa mo etsa e mong oa banna ba baholo ba kileng ba fihla holima lefatše esale ho qala ka Jesu Kreste. E ne e le khetho ea Molimo.

401 Kajeno, re leka ho khetha. Lona likereke, le roma monna enoa mona, le monna eane mona. Ha ea lokela joalo. Molimo

ke oona o tsamaisang. Ke Molimo ho bohle, ka bohle, holima bohle; hase ka tokomane e itseng ea kereke e itseng. Ke seo Molimo a se boletseng ka eona, ke sona se etsang phapang.

⁴⁰² Lemohang. Molimo o etselitse Abrahamama pallo, e sa beoa tlasa mabaka. 'Me joale, be butleng, Abrahamama o ne a sa tlameha ho etsa letho. Molimo o itse, "Ke se ke entse hona."

⁴⁰³ Molimo o etselitse Adama pallo, oa re, "Adama, ha u sa ame *sena*, u tla phela ka mehla. Empa mohla u se jang, u tla shoa mohlang oo."

⁴⁰⁴ Adama o itse, "Kea ipotsa ebe hoo ho bolela'ng, le hona?" O a tloha 'me o a e ja, ho itsunya.

⁴⁰⁵ Nako le nako ha Molimo o etsa . . . motho o tlabola selekane sa hae le Molimo, kapa Molimo le motho, motho o roba karolo ea hae. Ka hona Molimo oa tlameha ho etsa ho hong, kaha O bone seo motho a leng sona. 'Me ba ne ba reriloe-pele, ba khethiloe, eaba Molimo o tlameha ho etsa ho hong. Molimo oa theoha oa tlabola selekane sa Oona le Abrahamama, mabaka a sa kenngoa. Hola ea e-ba tlasa mabaka, Abrahamama a ka be lahlehle, khale koana.

⁴⁰⁶ Mo shebeng a sa lutse tlase moo Gerare, e le mongala, a bua leshano. 'Me a nea monna e mong mosali oa hae, ho ipholosa. Monna ea mokakang! Ea lutseng ka ntle mono, e le mongala. Molimo o moleletse, oa re, "U se tlohe holimo mona. Lula holimo mona." Tlala ea mo leleka ea mo ntša. A solla tlase moo lintho li leng bonojana. Le tseba se hlalhelang mothaka ea khethang tselā e bonolo.

⁴⁰⁷ A solla tlase, moo makhulo a leng matalana. 'Me ha a fihlile mono, a re ho morena mosali oa hae ke "khaitsemi" ea hae, ho pholosa letlalo la hae. Joale, e ne e le leshano. 'Me monna ofe, ea nkang mosali oa hae a mo nea monna e mong, ho ipholosa! Keha a eme mono, a lutse motšeo mono ka hara tentenyana, mongala, a bua leshano, 'me a fapohile ka hohle, a hlaotsoe pallong ea hae le nthong eohle, empa e ntse e le moporofeta oa Molimo.

⁴⁰⁸ 'Me Abimeleke e le eo, e le monna ea lokileng, monna oa khalalelo. Ehlile, a etsa lithapelo tsa hae bosiu ka bong. A fumana nkho no enoa, oa lilemo tse lekholo, ea theohetseng mono, a le motle a boetse bocheng. A re, "Esale ke emetse ngoanana eo, ka hona ke tla mo nyala."

⁴⁰⁹ Abrahamama a re, "U ka mo fumana. Ke khaitsemi ea ka." Eèna, "Ke moena oa ka eo."

⁴¹⁰ Ka hona eaba o mo nka a mo isa koo a laela basali ho mo hlatsoa le—le ho mo apesa liaparo tse ntle, ba mo hlophisa se ka—se ka mofumahali. Eaba o rapela lithapelo tsa hae, a ikotlolla moalong, a qethosa maoto a hae, a re, "Hosane, ke tla nyala ngoanana e motle eo oa Moheberu, e leng khaitsemi

ea—ea moshanyana eo ka ntle mane. Oh, ho tla babatseha. Oho Morena, U a tseba ke U rata hakae! E, monghali. Ho a babatseha!”

411 'Me Molimo oa re, “U se u le monna ea shoeleng.” Uh-huh!

[Moena Branham o a hohlola—Mong.] Ntšoareleng. Abra- . . .

412 Khele, Abrahamama keha a lutse koana, ka leshano, e le mongala. 'Me monna e le enoa, monna ea tšepelang e leng monna ea lokileng. “Khele,” a rialo, “Morena, U tseba botšepeli ba pelō ea ka. Ana ha se eëna ea mpoleletseng, a re ke 'khaitseli' ea hae?”

413 Ha thoe, “Ke tseba ho tšepaha ha pelō ea hao. Ke ka hona Ke u thibelang ho Ntšitela. Ke hantle. Ke tseba ho tšepaha ha pelō ea hao. Empa monna oa hae ke moporofeta oa Ka.” Allēlua! Oh, ha e se mohau oo, ebe ke eng? “Mongala, o buang leshano, o lutse ka ntle mono, empa e sa ntse e le moporofeta oa Ka. Hlahisa nyehelo, u ee ho eëna, 'me u busetse mosali oa hae, ho seng joalo u monna ea shoeleng. Ha Ke sa tla utloa lithapelo tsa hao. E re a u rapelle.” Amen. Ke moo. “Ke moporofeta oa ka.”

Joale, u re, “Oh, hola ke le Abrahamama.”

414 “Ha re shoele ka ho Kreste, re Peō ea Abrahamama, le majalefa ka pallo.” Hantle. Bible e boletse joalo. Na le ka rata ho Le bala? Khele, Bible e itsalo, ea re pallo ha ea etsetsoa Abrahamama le lipeō tsa hae. Joaleka uena, Abrahamama o bile le lipeō tse ngata, ehlile, bana ba bangata. Ishmaele e ne e le ngoana oa hae. O fumane bana ba supileng kapa ba robeli hoba Sara a shoe, ka e mong, Ketura. Empa, shebang, peō e ne e le eo oa pallo, eëna Isaaka, 'me ka Isaaka ho tlile Kreste, ka Kreste ho tlile rōna. Pallo ha e a theoa holima mabaka.

415 Joale, ho thoeng ka Abrahamama? Khele, ho ka be ho felile ka eëna, a ka be a sa khona ho khutla. Ehlile. Saule a ka be a sitiloe ho khutla hape, haeba hoo, o tla tlameha ho bala Lengolo ka tsela eo. Ua bona? Empa ha ho a ba joalo. Lipallo tsa Molimo li tiisetse ka mehla.

416 Ha re baleng motsotso feela mona. Ke batla ha le Le bala. Ke batla le phetle ho Bagalata 3:16, le bale sena, le bone seo pallo e leng sona, le ho bona haeba—haeba re le pallo ea Oona kapa che, 3:16. Mamelang mona. Ho lokile. Ke tlil'o bala temana ea 15, le eona.

Banabeso, ke bua ka mokhoa oa batho; Selekane leha e le sa motho, ha se se se tiisitsoe, ha ho ea ka se felisang, leha e le ho ekeletsoa.

'Me joale pallo li etselitsoe Abrahamama le leloko la hae, leloko (leloko), la hae,

“Ho Abrahamama le Peō ea hae.” Joale le shebe.

Ha ho thoe, Meloko (bongateng), joaloka hoja ho boleloa e mengata; empa ka ho lekanya le . . . leng feela ho itsoe, Le ho leloko la hao, e leng Kreste.

417 Ebile, Kreste e ne e le Peō ea Abrahamama. “Me ha re shoele ka ho Kreste, re kolobelitsoe ’Meleng oa Hae, re Peō ea Abrahamama, le majalefa ka pallo.” Ebe ho joang, u tla oa joang, haeba Molimo a u etselitse tšepiso? Ebe u tla oa joang le ka mohla, le ho tloha ’me u tlamehe ho ea lihelong ka eona?

418 Joale, u re, “Be, na ebe re ke ke ra oa?” Ehlile bo. ’Me ha u oa, u tla e fumana, u se ke ua tšoenyeha. Abrahamama o ile a e thola, le ba bang ba e fumane, le uena u tla e thola. U se e nahane e u fa tokelo ea ho etsa sebe. Ha e etse joalo. U tla lefa ka sohle seo u se etsang. U tla kotula seo u se jetseng. Ha u etsa sebe se le seng se se nyenyane u tla kotula batehali eohle e tletseng. Ke hantle. Empa, moena, ha e bolele hobane u lahlehile. Ke hantle haholo. Abrahamama o kotutse seo a se jetseng. Ke hantle. Empa a sa ntse a bolokehile.

419 Selekane seo Molimo o se tlabotseng le Iseraele: ba lahlehetsoe ke lefa la bona le ka hare, ba lahlehetsoe ke lefatše la pallo ’me ba theohela Egepete, ba mpa ba sa lahleheloa ke selekane. Molimo o itse, “Ke hopotse pallo ea Ka ho Abrahamama. Kea hopola, ’me Ke theohile ho lopolla batho ba Ka. Theohela mono, Moshe, u bolelle Faro, Ke itse, ’Lesa batho ba Ka ho ikela.’ Ke sa hopola hoba Ke etselitse Abrahamama le peō ea hae pallo.”

420 Ho joalo le ka rōna. Ka hona haeba u shoele, ’me bophelo ba hao bo patiloe ka ho Molimo, ka Kreste, ha ho letho le ka u amang lefatšeng. Joale, u ka tloha oa etsa phoso, empa ha u hlile, ruri, u le ngoana Molimo, ’me u ipona u entse phoso, u tla tsoha hape ’me u boele u leke. Ke hantle, ’me u ke ke ua robala mono.

421 Empa ha u apere bokoala, ha u le hlabahlabane, ha ho “tsoha” ho le sieo ho uena, u tla re, “Ah, be, ho ne ho se letho ho Eona, le hona.”

422 ’Muso oa Molimo eka monna ea nkang letlooa a kena leoatile, a le lahlela. Ha a fihla, o fumane likhulu, liqaqane, linoha, mekholutsoane, liōkho, le hlapu. Ke Evangeli eo mohla E boleloang.

423 Joaleka ha Morena a ka bolella moreri, ea kang Moena Graham, “Nyolohela mona. Kena khoneng ena u tšoase nakoana, Moena Graham.” Ho lokile, o tšoara letlooa la hae o nyolohela mono a qale sesefe.

“U ea kae, Moena Bill?”

“Ke tsoela nqa e ’ngoe, ke tla lahlela khoneng ena.”

424 Kea hula, “Ke bao, Morena, U tseba seo ba leng sona.” Ke boele ke hule letlooa, “Ho lokile, ke bana, Morena.”

425 Joale, khulu e ne e le khulu, le qalong. U mpa u tšoasitsoe ke letlooa feela. Ke hantle. Le batho ba tšoasoa joalo ke maikutlo, “Oho Allelua! Allelua! Ho bokoe Morena. Thoriso ho Molimo. Allelua!” Ba mpile ba tšoasoa ke letlooa, ke phetho.

426 Ha moea oo oa khale oa Khulu o ahile ka ho bona, ho se ho hokae, ba re, “Be, kea u bolella, . . .” Ke enoa a tloha, a khasa a khutla.

427 Leleiti la khale la Crawfish le tla re, “Ke mpa ke sa utloisise Hoo.” Ua bona?

428 Mofn. Seokho o lula mono nakoana, a etse “plop, plop, plop,” ho khutla hantle, “Be, ho ne ho se letho ho Eona, le hona.”

429 Mofn. Sepente o tla re, “Oh, ke mphi ea bathethehi bahalaleli. Ke phetho ho Eona. Ke tla theohela moo likello tsa bona li pholileng ho feta moo.” Khele, u noha, le ho qaleng. Letlooa la Evangeli le mpa le u tšoasitse, ke phetho.

430 Empa hlapi e isoa tafoleng ea Molaoli. E ne e le hlapi, le ho qaleng. Peō ea eona e ne e le hlapi. E qalile, e le hlapi, le Molimo o tsebile hlapi ea Oona esale ho theoa lefatše. Allelua!

431 Le hopole, tsohle li hema metsi a le mang a seretse ka ntle mono. Tsohle li hema letšeng le tšoanang. Ke hantle. “Bohle re entsoe . . . re noa Lefika le tšoanang la moea. Bohle ba jele manna feelleng.” Kalebe le Joshua ba jele manna ao—ao ba bang ba a jeleng. Athe bohle ba rapaletse feelleng. Empa ho tšetse bakhethoa ba babeli, ‘me ba tšetse. Ke hantle.

432 “Bohle re nositsoe Selibeng se le seng.” Empa bohle ba noeleng ha ba bolokeha. Re neiloe bohle ho hlaba litlatse. Bohle re neiloe ho nyakalla ‘moho. Empa Mokhethoa o a bolokeha. Na le lemohile? E itse, “Meea e ‘meli, matsatsing a qetelo, e tla bapa ho ka thetsang Bakhethoa hola ke ntho e ka etsoang,” *hola* ke ntho e ka etsoang. Ua bona? Oo ke Moea oa Molimo oa makhonthe, o khethetsoeng Bophelo Bosafeleng.

433 Joale rea koala. Ebe Moena Neville o e thonaka ho qala moo ke e siileng. Ho lokile.

Ha ho le joalo seo ke se boelang, ke hoba selekane, se tiisitsoeng pele ke Molimo holima Kreste, molao, o tlileng kamora lemo tse makholo a mane, makholo a mane a mashome a mararo, ha o a ka oa se felisa, hore pallo e fetohle lefeela.

Ke eona pallo e filoeng Abrahamama ke Molimo, le pele molao o kena tšebetsong.

Hobane hola ebe . . . hobane hola lefa le neoa ka molao, ha e sa le ka pallo: athe Molimo o le neile Abrahamama ka pallo feela.

Ha se ka seo u se etsang, ha se ka melao efe, melao efe ea kereke ea hao, ka ingolisa le kereke, kapa ka molao ofe. Ke ka ketso ea mohau oa Molimo feela, nqa ho uena. Ke lona bao.

434 Sheba.

Ha ho le joalo molao ke oa ho etsang? O beiloe ka baka la tlolo, ho tle ho be ho fihle leloko leo pallo li etselitsoeng lona; . . .

Na taba eo ha e a totobala sa nko ea sefahleho sa ka? “O beiloe, ho tle ho be ho fihle Peō, eona e ne e le Kreste, Eo pallo e etselitsoeng eèna.”

. . . 'me o tiisitsoe ke mangeloi le ka matsoho a 'muelli.

'Me 'muelli ha se oa a le mong, empa Molimo o mong.

435 Joale, ke e tlohela ho tloha mona, Moena Neville o tla qala hona moo, Laboraro lena le tlang.

436 Joale na le utloisisa seo re se boletseng? [Phutheho e re, “Amen.”—Mong.] Ha ho kamoo Mokreste ea tsoetsoeng labobeli ea. . . Ha ke bolele, joale, eo ea *ipitsang* eèna, “ea tsoetsoeng labobeli.” Ke bolela, oa makhonthe, Mokreste ea tsoetsoeng labobeli, hore a ka oa mohaung, a ke ke a etsa joalo. A ka oa, ke 'nete, empa a ke ke a khona, le ka mohla, a tsoela kantle ho mohau oo.

Abrahama o ne a oe mohaung. Ehlile, o entse joalo. Molimo o kile oa 'molella ho “lula mono.” O kile a tsoa ho eona, empa ha a lahlehelo a ke selekane sa hae. A lula e ntse e le mokhethoa oa Molimo. E ne e le moporofeta ea lutseng. Esale e le eèna. E tla be sale e le oa Molimo.

437 Joale elelloang. Bible e boletse, ha thoe, “Iseraele eohle e tla bolokeha.” Ba e tsebang ba bakae? Bible e itse, “Bohle Iseraele eohle e tla bolokeha.” Joale, “Iseraele ha se Iseraele ka nama, empa Iseraele ka Moea, hoba lineo le lipitso ha li tlisoe ke pako.” Na Bible e itsalo, eona temana e latelang? Bagalata. Ho lokile. “Iseraele eohle e tla bolokeha. E mong le e mong oa bona o bolokehile.” Re fetoha Iseraele joang? “Ha re shoele ka ho Kreste, re fetoha Peō ea Abrahama, le majalefa ka pallo.”

438 Pauluse o boletse, “Mojude ha se ea ka ntle, empa ea ka hare, ke Mojude, bao ba Baletsoeng.” 'Me rōna re Peō ea Abrahama, ka pallo, ka Kreste, ha re Mo amohetse e le Moloki oa rōna.

439 Oh, ke tšepa u e bona. Ke tšepa u e tšoara, ha u ka lula le Eona nakoana e teletsana. Joale ka mona rea qetela, re ntano qala ka Melkisedeke, e leng taba e boelang e busetsa sena. Re qala hantle koana ho. . . Oh, E feela, ntho eohle e a babatseha. Re mpa feela re sa phetse ho kena mokong oa ntho eo.

440 Joale, ua bona, hola u ka nka ntho Ena mona, ekare, hola u ka E bala ka temoho. . . Joalokaha mocheseheli oa botrintase, ea lumelang ho Melimo e meraro, a kile a mpoella, ho re, “Matheu 3 e hlile ea tlaleha boraro boo, e le Batho ba bararo ba ikhethileng ba BoMolimo.”

441 Ka re, “Ke tlameha ho e bona.”

442 A re, “Sheba.” E le ha a eme hantle sefaleng sena, a re, “Sheba mona, Mattheu 3.” Ho re, “Eare Jesu ha a tsoile metsing, bonang, maholimo a phetleloa Eèna. Eaba O bona Moea oa Molimo eka leeba. ’Me Lentsoe le tsoang Leholimong la re, ‘Enoa ke Mora oa Ka ea ratoang eo Ke khahlisoang ke ho lula ho eèna.’ ’Me ho ne ho le ba bararo: Mora lebopong; Moea o Halalelang lipakeng; le Ntate holimo koana.”

Ka re, “Moena, Lengolo ha le balehe *joalo*.”

“Oh, e, le rialo.”

Ka re, “Joale Le bale hape, u fumane haeba Le itsalo.”

443 Joale, setšoantšo sa hae ke sena. *Enoa* ke Molimo, Mora; *eane* ke Molimo, Ntate; *enoa* ke Molimo, Moea o Halalelang, eka leeba. Joale sheba. Bibe e itse, eare ha Jesu a kolobelitsoe, “Mora a tsoa metsing, bonang, maholimo a phetleloa Eèna. ’Me Lentsoe la re ka . . . O bone Moea oa Molimo, Moea oa Molimo, eka leeba.” Ha se Motho e mong holimo *mane*, empa ona Moea oa Molimo e ne e le Leeba le holima Hae. Le Lentsoe le fihlang, le re, “Enoa ke Mora oa Ka ea ratoang, eo Ke khahlisoang ke ho lula ho eèna.” Joale bala Mattheu 3 ’me u bone haeba E sa rialo. Ua bona? Ha se batho ba bararo, ho hang.

444 ’Me ho joalo . . . Taba ena ha e re motho a ke ke a boela a khutla, ke hona, ha a oa mohaung. Ha e rialo. Ha e rialo. E re, “Ha ho kamoo motho a ka boela a inchafatsa, ha a se a kile a fihla mono.” A ke ke a khona.

445 Bibe e itse, “Ea tsoetsoeng ke Molimo, ha a etse sebe, hoba a ke ke a etsa sebe. Hoba peō ea Molimo e ahile ka ho eèna, ’me a ke ke a etsa sebe.” Nka bitsoa moetsalibe joang, athe sehlabelo se nkemelang se robetse mono? Nka shoa joang, athe ke lefeletsoe moputso oa lefu? Nka shoa joang, athe ke ruile Bophelo Bosafeleng? Nka e etsa joang? U ke ke ua e etsa.

446 Na majoro oa motse ona a ka mpha lengolo la tumello, ho khanna ka limaele tse mashome a tšeletseng hara motse ona, ebe ofisiri e mong o ntšoarella ho khanna ka limaele tse mashome a tšeletseng ka hora? U ka e etsa joang? Ke tšoare tumello ea majoro e ntumellang joalo. A ke ke a ntšoara. Ea hae—hae phomolo . . . A ka butšoela lenaka le ntho eohle, ka e nyemotsa feela. Ha e bolele letho; ke tšoare tumello.

447 Ho ka ba joalo joang, hape, kamora hoba Krete a nchoele ’me ke fetoloe ho loka ha Hae ka baka la mohau oa Hae le lerato ho ’na? Ebe nka etsa sebe joang, athe lipakeng tsa ka le Molimo ho robetse, sehlabelo? Nke ke ka etsa sebe. Ha se taba e ka etsoang. Molimo ha o mpone; O bona Krete. O nkemetse. ’Me ha ke etsa phoso, Krete o a nkemela. Ke ipoletse, “Ke phoso. Eèna o lokile. Morena, U tseba pelō ea ka. U tseba

haeba ke tiile kapa che. 'Me ke fositse. U ntšoarele." Molimo ha o e bone ho hang. Esale Mali a Jesu a nkoahetse, ka linako tsohle. Ka hona ebe Molimo a ka mpona joang? Ebe—ebe nka balloa sebe joang, athe A ke ke a khona? Hang feela ha ke se etsa, se tšoareletsoe. [Moena Branham o thantse monoana oa hae—Mong.] Ke hantle.

448 Eka ho tšoara e—e serothetsi ka mokhoa *ona*, serothetsi sa mahlo, ke ntano se tlatsa enke e ntšo ke se leketlise holima bathe ea semonyolli sa bolichi, ke ntano e rothetsa ka mono feela, ke ntoo leka ho e fumana. E fetoloa semonyolli sa bolichi. Enke e fetoloa semonyolli sa bolichi. 'Me ho joalo, ha libe tsa hao ha li boletsoe, haeba u le ka ho Kreste. Bathe e kholo ea semonyolli sa bolichi e eme lipakeng tsa hao le Molimo, 'me sebe sa hao se fetoloa ho loka kaha u emetsoe ke Sehlabelo se lokileng mono.

Ke tla fihla lelibohong tsatsi le phirimile,
Meea' hlomoho e se e fokile;
Pelō ea ka e thabisoa ke khopolo ena,
Jodane ena ha ke e tšele ke le mong.

449 Ke ntho e le 'ngoe e molemo. Ke ntho e le 'ngoe e molemo. Ha ke n'o tlameha ho e tšela. Le leng la matsatsi ana, re tla fihla qetellong ea tsela. Letsatsi le tla hana ho chaba, ke mohla Molimo a tla bitsa.

450 Adama o tla nanabela a sisinye Eva, a re, "Ratu, ke eona ena. Ke nako ea ho tsoha."

451 Eva o tla nanabela a tšoare Abele, ho re, "Tloo, moratuo. Ke nako ea ho tsoha." Abele o tla ea lata Setha. Le Setha a late Nooe. Nooe o tla lata. . . Oh, ho theoha joalo, ho theohela ho Abrahamana, le ho theoha ba sa tla joalo. Ho thothomela ho hoholo le tsoho li tla hlaha mohla Mora Molimo a fihlang. Ka letsatsi leo re tla ema ka setšoano sa Hae.

452 Joale, ha u etsa sebe mona, u tla buseletsoa. Ke se ke. . .

453 Ke lula ke hopola taba ena, ke tlameha ho e phetha. Ke lekile ho e tima, hane kapa ha hlano. Ke tlameha ho e phetha. Ba bakae ba hopolang moena enoa, moruti, e le setho sa church of God mona? Moena, hantle holimo mona, lebitso la hae e ne e le mang? O ne a sebeletsa Vorgang tlase mono. Oh, lona bohle. . . E le First church of God, hantle mona khoneng. Kapa, o ne a rekisa Rawleigh's mehleng eo ea—eo ea moruo o putlameng. Monna oa 'nete oa morapeli, oa mohalaleli. Moena Smith o tlatsitse malulo a hae holimo mono. Ke tla bitsa lebitso la hae metsotsong e 'maloa. E ne e le monna ea pholositsoeng ke Molimo.

454 Le hopole, ha u sa nke temoso, 'me u le Mokreste 'me u etsa phoso, Molimo o tla u lemosa. Ha u sa nke temoso, O tla u tlosa lefatšeng. Ke seo A se entseng.

455 Le sa hopola, kahara Bibe!e? Le shebe kereke eo ea Korinthe. O ba boleletse seo ba neng ba le sona, malulo a bona, ka ho Krete. Eaba o ba lemositse ka se tla hlaha. 'Me ba itokisa, ba itsepamisa, nqa Molimo.

456 'Me moenanyana enoa, e ne e le moenanyana ea khabane, kea kholoa, e le monna ea pholositsoeng ke Molimo. Eaba o thola mosebetsi mona nthong. . . mane Vorgang's. Ba habo ha ba lutse mona, kea tšepa ha le hopole ke. . . ha ke tsebe haeba le lutse mona. Empa, Ramsey, Moena Ramsey, ba hopolang Moena Ramsey ba bakae holimo mona Church of God? Ehlile, bo, monnana ea lokileng. 'Me o ne a tloaetse ho nketela lapeng re qoqe, re lule mono re lle re tšoarane ka matsoho; Mokreste oa makhontho.

457 Tsatsi le leng ka kena ho eona tlase mono, ke tsoa khutla kopanong ea mose ho maoatle, e le ha ke isitse koloi ea ka ho hlalhojoa, Moena Ramsey a re, "Nka u thusa ka'ng, Billy?"

458 Ka re, "E hlahlobe, Moena Ramsey. Hlotla oli."

459 "Ehu," a rialo, "ke botle, bo." Ho re, "U bile le kopano e khabane?"

460 Ka re, "Oh, Moena Ramsey, e ne e babatseha." Ka re, "Ekare u ka tsamaea le 'na ka nako e 'ngoe. Hore'ng u sa tsamaee le 'na?"

A re, "Ha ke sa sebeletsa Morena, Billy."

Ka qamaka, ka re, "U itseng?"

461 Ea ka o re, "Ha ke sa Mo sebeletsa," a tloha a tsamaea.

462 Ka nahana, "Oh, o mpa a tsamaile feela." Ka tsoelapele, ka ea nqa e 'ngoe.

463 Ka khutla ka kena koloing ea ka. Ka fihla lapeng, ka qala ka e nahana, "Ha ke sa sebeletsa Morena."

464 Morena a bea pelōng ea ka ho khutla ho ea 'motsa hape. Ka hona, ka re, "Meda, be butle feela."

465 Ka kena kahare, eaba ke kena koloing ea ka ho theoaha ke khutla, ka emisa hape, ka kena Vorgang's. Ka re, "Moena Ramsey, ke batla ho u botsa potso."

Ho re, "Ho lokile, Billy, ke efe?"

Ka re, "U buile, nakoana e fetileng, ua re ha u sa sebeletsa Morena. U ne u nqhokola feela, ha ke re?"

A re, "Che."

Ka re, "Moena Ramsey, ha u—u rialo hle."

A re, "E."

Ka re, "Ha u Mo rate na?"

A re, "Hola ke Mo rata, nka be ke Mo sebeletsa. Ha ke re, Billy?" a tloha a itsamela.

Ka nahana. “Hela, Moena Ramsey!”

Ho re, “Ha ke sa batla ho bua ka eona.”

⁴⁶⁶ Ka ea hae, ka kena phaposing, ka koala lemati. ‘Me, oh, u a tseba ha u ikutloa u imetsoe haholo, ekare u amohile lesea likuku kapa ho hong, u a tseba. Ka—ka nahana, “Eng? Ho ke ke ha ba joalo. Ruri Moena Ramsey o hlaketsoe ke ho hong.”

⁴⁶⁷ ‘Me ho na le moshanyana oa bammala, ea bitsoang Jimmy, o kena kereke mona. Leoto la hae le leng, u a tseba; o batla, a qhiletsa. Ke lebala lebitso la hae, o sebetsa tlase mono Vorgang’s, o silakanya litšepe. O ile a kopana le ‘na, a re, “U a tseba, Mor. Branham,” a re, “Ha ke tsebe bothata ba Ngk. Ramsey mona.” A re, “Ke mo boleletse, tsatsi le leng, ho re, ‘Bohle re ne re tšaba le ho bula melomo ea rōna mona.’ Ho re, ‘U ne u le monna oa morapeli.’ Empa,” ho re, “O ile a nka laksense ea hae ea moreri a ea moqomong a e tabola, a e lahlela moqomong, ho re, ‘Ha ke sa batla letho la eona.’”

A re, “Hei, mohlomphehi!” Ho re, “Ha u a tlameha ho etsa joalo.”

A re, “Oh, Jim, ke qetile ka Morena.”

Eaba o tsoelapele, ho re, “Ha u a tiea hle.”

⁴⁶⁸ Le ho re, “Eaba o a mpoella, a re o tli’o theoha a hohle livelofo tsa hae, ka Letsatsi la Basebetsi,” kea kholoa. “Eaba o re, ‘Joale, ke batla u tle ho nthusa, Jim.’”

⁴⁶⁹ A re, “Ke tla u thusa ha ke tsoa kerekeng, empa pele ke ea kerekeng.”

⁴⁷⁰ Ha thoe eaba o a khutla, “‘Me Mongh. Ramsey a ntse a hohla livelofo tsa koloi ea hae. A re, ‘Jimmy, ako tšele noka. Lisalono li koetsoe mona. Tšela noka u ntlele kheisi ea biri.’”

⁴⁷¹ A re, “Mongh. Ramsey, ke jere molato oa lintho tse ngata, empa nke ke ka jara molato oa ho thotela mohlanka oa Morena kheisi ea biri.” A re, “Che, monghali. Nke ke ka etsa taba eo.”

⁴⁷² ‘Me a re, “Be, tsamaea. E late, Jim.”

⁴⁷³ A re, “Mongh. Ramsey, ke tla hohla livelofo tsa hao. Empa ha u batla biri, e-ea u itatele eona.” A re, “Nke ke ka tlala mohlanka oa Morena ntho e kang eo.”

⁴⁷⁴ Ka hona Ramsey a qhomela koloi ea Jimmy, a tšela noka; a khutla, a batla a tahilo, a tšoere kheisi ea biri, a ntse a bo noa.

⁴⁷⁵ A qala a theoha, ‘me a kula. Ua bona? Molimo ha o a khona ho buisana le eèna. Ke mo lemositse, ka etsa sohle ka bokhoni ba ka. Moena Smith a theohela ho eèna a mo lemosa. Mang le mang a leka ho mo etsa letho. Le joale, a tsokotsa hloho ea hae. Ha etsahalang? Eaba o a kula ‘me a shoa. Hoo ho mo supile e ne e le monna ea pholositsoeng. Efèla ha Molimo o sitiloe ho mo...ho mo bea tlasa kutlo, O tla tlameha ho mo

tlosa lefatšeng a mo ise Lapeng. Ehlile Bibe e itsalo. Ke seo Bibe e se tšepisang. Ha u sa khone ho mamella temoso, u tlameha ho khutlela Lapeng.

⁴⁷⁶ Molimo o ke ke oa lahlehelo a ke uena kamora hoba A u pholose, empa A ka khutsufatsa matsatsi a hao mona, le ho u lefisa sebe ka seng seo u se entseng. Ka hona, ha u etsa sebe, u tla lefella seo u se entseng. Lula u hopotse hoo.

⁴⁷⁷ Joale, joale Morena a be le lona. Kea lumela, bosiuong bona, hore Moena Ramsey o ne a pholositsoe. Ruri bo, kea e lumela. Empa o hanne ho utloa Molimo, eare ha a sitiloe ho utloa Molimo, Molimo oa tlameha ho mo tliša lapeng. Ke eona feela ntho e ka etsoang, hobane, e ne e le eng? “O ne a tliša sekhubo le nyatso holima Mali a mo hlatsoitsoeng.” Ke hantle? “Me o bala selekane e le ntho e litšila,” haeba e se seo lengolo lena la Baheberu le se buileng. Ua bona? Ha ho kamoo a ka lahlehang kateng, empa o tliša lihela lihlong le nyatso, ka hona Molimo o tliša tlameha ho mo tliša lefatšeng a mo ise Lapeng. Ke sona se etsahetseng hantle.

Joale Morena a hlohonolofatse, re sa inamisa lihloho tsa rōna nakoana ea thapelo.

⁴⁷⁸ Joale, Ntate ea mohau le ea halalelang ka ho fetisa, ruri re U leboha ka tšepiso eo re e tšoereng, e reng U ke ke ua re tlohela leha e le ho re furalla. U tšepisitse hore U tliša tsamaea le rōna bophelong, 'me lefung U be haufi le rōna. U re tšepisitse hore re fumane Bophelo Bosafeleng. U re neile Bona ntle le tefiso. Re ke ke ra lahlehelo a ke Bona. “Bohle ba tlang ho 'Na, ba na le Bophelo Bosafeleng.” Efela ha e le Bophelo Bosafeleng, ha Bo na qetello, 'me U tšepisitse ho re tsosa letsatsing la bofelo. Hona re ho leboha haholo. Re motlotlo ha Lentsoe la Hao le re ruta sena. Le re nea tšepo e tiileng. Le re tsebisa hobane Ntate oa rōna ke Lerato. O a re rata, 'me O re khethile. U itse, “Ha se lona ba Nkhethileng, empa ke 'Na ea le khethileng ea le rerileng.” 'Me kea U leboha, Ntate, ha U entse hona. 'Me ba bangata ba lutse mona, bosiuong bona, e leng ba reretsoeng Bophelo Bosafeleng, 'me ba amohetse Jesu Krete e le Moloki oa bona. 'Me litholoana tsa Moea li latetse bophelo ba bona: mosa, bonolo, boikokobetso, lerato, thabo, khotso, mamello, molemo. Re lebohela lintho tseo.

⁴⁷⁹ 'Me rea rapela, Ntate, ha ba bang ba le teng ka mona, bosiuong bona, ba sa saloa morao ke litholoana tseo, ba mpa ba itšetlehile ka tšomo e itseng, ka hobane ba fehliloe, tsatsi le leng, ba ile ba sisimoha, ba ikutloa ba thabile, mohlomong ba hlabile litlatse, mohlomong ba entse lintho tse ngata. Empa, Ntate, ha ba se na tholoana ea Moea, e ba baballang leratong letsatsi le letsatsi, ba tšoarela lira tsa bona, ba lokisa liphoso tsa bona, le ho phela ka khotso le ka lerato, le ka mosa le ka molemo nqa e mong, le ka cheseho nqa Kereke,

lerato ho Kreste le ho bana ba Hae, oho Molimo Rabosafeleng, ba tšoarele. Leha koana e le litho tsa kereke, litho tsa 'mele oa lefatše, ba ke ba tlohe joale 'me ba lahlele lintho tseo tsa nama kathoko, mesebetsi e shoeleng, le ho hahamalla kholong e tletseng. Aba sena, Morena. Ba ke ba finyelle ho Ea phethehileng ba Mo amohele e le pheko ea libe tsa bona, hore A tle a emele monna ea molato le mosali ea molato e le sehlabelo se phethehileng. 'Me ba fepeloe mohau oa Hae oa lerato le oa khotso, ba be ba finyelle ka pela Sefahleho sa Molimo ho phela ka mehla. Aba sena, Ntate.

Re sa inamisitse lihloho tsa rōna:

⁴⁸⁰ Ea batlang ho ananya bophelo ba nama ba meetlo, ba likolobetso, ba lisisimoho, ba linthoana tsa nama tse kang tseo, ho amohela pelō ea makhonthe e tletseng lerato la sebele, e—e u khontšang ho atamela sera sa hao se khohlahetseng ka ho fetisa, ho se kopela ka matsoho a hao ua re, “Moena, ke tla u rapella. Kea u rata.” Ha u batla ho ananya boiphihlelo boo ba linthoana tsa nama ho nka boiphihlelo ba sebele ba lerato, ana u ka phahamisetsa Molimo letsoho la hao? Ua re, “Molimo, nkuke bosiung bona, ho mphetola se ntšoanelang.” Ke tla u rapella, hantle ho tsoa sefaleng mona. Na u lakatsa thapelo? Phahamisa matsoho a hao.

⁴⁸¹ Molimo a u sitse morao mono, monghali. Molimo a u sitse, moena. Motho e mong hape? Molimo a u sitse, monghali. “Ke qetile lilemo kahara kereke.” Molimo a u sitse, monghali. Molimo a u sitse uena mona, moena. Molimo a u sitse morao mono, leleitinyana. “Ke tla kopa Molimo ho ntlatsa khotso.” Na u a . . . Na u hlile u a befa? Na u linthoana-nthoana? Na u a belaela? Na u isoa koana le koana? Na u ipotsa haeba E ehlile e le 'nete kapa che? Ha u tla ho Kreste, na u tla ka kholiseho e tletseng, ka pelō e tletseng lerato? Na u Mo atamela tšabo le e 'ngoe e le sieo, u ntse u re, “Ke Mo tseba e le Ntate oa ka”?

⁴⁸² 'Me ha ho sa le tsuo, u falletse lefung ho kena Bophelong. U a e tseba. 'Me u elelloa bophelo ba hao: u lerato, u a tšoarella, u mosa, u tletse khotso, u bonolo. Litholoana tse na tsohle tsa Moea li teetse bophelo ba hao hare, letsatsi le letsatsi. 'Me kapele ha u sitoa, “Oh, khili.” Hang ha e fihlela mohopolo oa hao, “u entse phoso,” u se u e lokisa ka potlako, hona moo. U se emele motsotso o mong, tloha hona moo u e lokise. Ha u sa etse, be, ha u na Moea oa Kreste. U ka ba mosali ea lokileng, u ka ba monna ea lokileng, u ka nkeloa holimo kerekeng, u ka nkeloa holimo tikolohong, empa na u fetetse kholong eo e tletseng, moo u tšepileng Kreste ka botlalo? 'Me ka sena, u fuoe tiiso. “Abrahama o lumetse Molimo, a ba a balloa hoba hoo ke ho loka. Eaba Molimo o mo fa tiiso ea lebollo, e le thasisetso.”

⁴⁸³ Joale u re, “Ke lumela Molimo. Ke ipoletse.” Empa na Molimo o u file tiiso ea Moea o Halalelang, holima bophelo

ba hao, ea lerato, thabo, litholoana tsa Moea, ho paka hore u pholositsoe? Haeba A eso etse hoo, e tla ba le joale ha A eso hlomphe tumelo ea hao. U mpa u ipoletse feela. Ha A eso e amohele, phoso e teng. Na u ka rata ho Mo amohela, ke hona? Phahamisa letsoho la hao, ha e mong a le teng, pele re rapela.

484 Molimo a u sitse, leleitinyana. Molimo a u sitse morao mono, le uena. Molimo a u sitse. Ho lokile. Motho e mong hape, pejana re rapela? Ho lokile. Molimo a u sitse, morao mono, khaitseli. Molimo a u sitse, moena. Molimo a u sitse, moena. Molimo a u sitse, moena oa ka. Ke hantle. Matsoho a ka bang leshome, a leshome le metso e mehlano a phahame.

Joale ha re rapeleng.

485 Morena ea bokoang, litulong tsa bona, ba fumana aletare. E setulong sa bona, moo ba lutseng teng hona joale, moo U buileng le lipelō tsa bona, ha thoe ba “phoso.” Ke litulong tsa bona moo U kentseng takatso pelōng ea bona, ho re “ba lakatsa ho tšoana le Jesu ho feta.”

486 Ba batla maphelo a bona a fetotsoe. Ba batla ho ba bonolo le ho ikokobetsa. Ba batla ho ba mosa 'me ba tletse mamello. Ba batla tiisetso, ho jarelana. Ba batla ho tšoana le Mokreste, ho tšoana le Kreste, lefatše le be le re, ha ba theoha ka seterata, “Ruri monna eane ke Mokreste. Ruri mosali eane ke Mokreste. Oh, ba hlie ba mosa, ba bonolo ho feta, ke batho ba molemo ka ho fetisa!”

487 Aba sena, Morena, e re ba amohele boiphihlelo boo, bosiang bona. 'Me ba se itšetlehe ka boitsebelo ba kereke ea bona, ka lilekane tsa kereke efe ea bona, bolumeli bofe; kapa holima lisisimoho tsa bona, holima semaka sefe, se kang sa tšisimoho, ntho e etsahetseng; ekaba ba hlabile litlatse, ba ba hile ka lipuo, kapa ho hong.

488 Oho Molimo RaBosafeleng, ba se leke ho itšepisa ho ea Leholimong ka hoo, kaha re e bone e hloleha hampe ka makhethlo. 'Me U itse e tla hloleha, “Ha e le lipuo, li tla khaotsa! Ha e le boporofeta, bo tla fela. Ha e le tsebo, e tla fela. Oh, lintho tsena tsohle, kapa esita le lineo, mehlolo ea pholiso, e tla felisoa. Ke lerato le Mokhethoa leo feela le tla sala.”

489 Molimo, bopa seo ka pelōng ea bona, 'me ba tsebe hore oo ke Moea o hlahisang litholoana. Etsa hoo joale, Morena, re sa U emetse, hoba re e kopa ka Lebitso la Jesu. Amen.

490 [Sekheo lebanteng—Mong.] Likhanare tse fefohang tsa mollo, le ho bona maebakhoroana a fofela morao le pele ka moahong, ho bona Kreste a fihla ka meutloa matsohong a Hae, le ka ntho ea Hae. . . Oh, na le tsebile leo ke leano la antikreste? O itse, “E tle e re ha lintho tsena li hlaha, le lelale, topollo ea lona ea atamela.” Ke ka hona ke ratang ho hatella motsotso o mong le o mong oo nka o khonang ho kereke, le ho

le tiisa. Moena Neville a ke ke a ba le rōna ka linako tsohle. Kea lumela Moena Neville ke moruti ea lokileng, ea tiileng oa Evangeli. Ha re tsebe se tla khasa se kena sefaleng sena, 'me, mohla se fihla mona, "Linku tsa Ka li tseba Puo ea Ka." Lulang le Lentsoe leo. Le se ke la tlhela Lentsoe leo le ka mohla. Le lule le Lona hantle. Le eme ka sebete tokolohong eo Kreste a le lokolotseng ka eona. Le se tsoasoe linthong tseo tsohle tsa joko ea bokhoba le tse joalo. Emang le tiile, le lokolohile. Molimo o tla le sitsa. Ha rea tlameha ho tsoa ka letho lefatšeng.

⁴⁹¹ Ha le phetse ho ipotsa. Ke hlokomela batho ba tsoelang ka pele ho rapelloa, ba ee ba khohlele moleng. Khetlo le latelang ha ba bona letšolo la pholiso, ba tla kena moleng *ona*, ba tla kena moleng *ona*. Ha ke ba ahlole. Ba leka ho hlasimoloha, ba mpa ba e atamela ka phoso. Le hlanamisa lintho, e leng seo Molimo o sa le bolellang ho se etsa. Ua bona? Ha u atamela Terone ea mohau ka sebete, 'me u lumela, ho re, "U kopile, u tla fumana." U lule le Eona. E sebetsoa joalo; ha se ho hlehla u tlaha tsoseletsong ho ea tsoseletsong, ho tlaha kerekeng ho ea kerekeng, ho tlaha letšolong ho ea letšolong.

⁴⁹² Khele, ba fetotse matšolo a pholiso qubu ea lithole. Ruri, ba entse hoo. E fihlile moo, batho ba hlalefileng, ba qamaka 'me ba ipotsa se etsahalang ka eona. Mono, Molimo ha o batle lintho tseo. Pholiso ha e a tlameha ho etsoa kahara matšolo. Pholiso e tlameha ho hlakisoa kahara kereke ka 'ngoe ea lehae, moo lineo tsena tsohle li sebetsang teng. Empa le se ke la melisa peo ka lineo tseo. Le se ke la tsotella neo. Molimo ha o batla ho u sebelisetsa letho, O tla e etsa. Le mpe, le sale Moabi morao.

⁴⁹³ Martin Luther, ka mohla o mong kamora ho bua ka lipuo, a botsoa lebaka la hae ho se rere ka tsona, a re, "Ha nka li rera, batho beso ba tla sala neo morao sebakeng sa Moabi." Ke hantle.

⁴⁹⁴ Moody, ka mohla o mong, ha a ntse a bua, 'me a qala, mohla ane a rera tlasa pululelo ea tonana, o kile a bua ka lipuo. A re, "Molimo, ntšoarele ka ho bebenya mantsoe a sethoto." Ruri. Ua bona? 'Me ba ne ba e na le lintho tseo. Re lumela lintho tseo, empa li tšoanela ho beoa malulong a tsona. 'Me ha lia tšoanela ho hlahisoa e le bopaki.

⁴⁹⁵ Ha ho a siiuoa ntho le e 'ngoe kahara Bibe, e le "bopaki ba Moea o Halalelang," haese litholoana tsa Moea. Iphumanele sebaka sefe moo Jesu a itsalong. E, monghali. Bopaki ba Moea o Halalelang ke tholoana ea Moea oa hao. Jesu o itsalo, "Le tla ba ka tholoana ea bona." "'Me tholoana ea Moea ke lerato, thabo, khotso, mamello, molemo, khotso, mosa, bonolo. Athe tholoana ea sera ke bora, lehloeo, lonya, khang, le tse joalo; eo ke tholoana ea sera." Ka hona, u ka ahlola ka bophelo ba hao, kemo ea hao le Molimo. Ha pelō ea hao eohle e Mo rata, 'me u Mo

rata 'me u le mosa, 'me u phela le Èèna letsatsi ka leng, u a tseba hobane u tlohile lefung ho kena Bophelong. Ha ho se joalo, 'me u le ka mokhoa o sele, u mpa u etsisa Mokreste. Ke hantle. Etsoe, boetsisi bohle ba nama bo tla pepesoa. Re tseba seo.

⁴⁹⁶ Ka hona, se phele bophelo ba mofuta oo, ha u a tlameha. Hore'ng u ka amohela phapanyetso, athe lipakapaka tsohle holimo li tlatsitsoe ka molemo le makhontho? Ruri. Ha nke ke nke Molimo, ke batla hona hoo. Amen.

⁴⁹⁷ Joale, o teng motho ea tlileng ho rapelloa? Haeba u entse joalo, phahamisa letsoho la hao. Re ne re tsoere tšebeletso ea pholiso hoseng hona. Kea kholoa he. . . Leleiti lena mona? Ho lokile, khaitseli, na u ka tla kapele? Le moena oa rōna, moholo, mona, tloong joale le tlotsoe.

[Sekheo lebanteng—Mong.]

. . . nchabele hle;

Oh, nchabele hle, Morena, nchabele hle,

Leseli la ntluleseli le nchabele hle.

⁴⁹⁸ Na ha A babatsehe? Ha re inamiseng lihloho tsa rōna feela, ka khutso ea ruri joale. 'Me, *Nchabele Hle*, hape. Joale, tloong joale, mang le mang, ho re, "Nchabele. . ." Ako Mo rorise moeng oa hao joale, ua bona, ho a khutsa. Tšebeletso ea pholiso e tla latela. Molaetsa o fetile. Ha re roriseng.

Leseli la ntluleseli le nchabele hle;

Oh, nchabele hle, Morena, nchabele hle.

Leseli la ntluleseli le nchabele hle.

Ho tsoana le Jesu, ho tsoana le Jesu,

Oh, lefatšeng ke kopa ho tsoana le Èèna;

Leetong la bophelo ho tlha lefatšeng ho ea

Khanyeng,

Ke kopa feela ho tsoana le Èèna.

Re tsamaee Leseling, ke Leseli le letle bo,

Tloo moo phoka e khantšoang ke mohau;

Re chabele, hona motšehare le bosiu,

Jesu, Leseli la lefatše.

Tumisang lona ba Leseli,

Jesu, Leseli la lefatše,

Tl'oko tsa Holimo li tla letsoa,

Jesu, Leseli la . . .

Re amohele, Morena, re sa U rorisa.

Re tsamaee Leseling, ke Leseli le letle bo,

Tloo moo phoka e khantšoang ke mohau;

Re chabele hona motšehare le bosiu,

Jesu Leseli la lefatše.

⁴⁹⁹ Na ha le rate ho faloa hoo? Le thabile na? Phahamisa letsoho la hao, u bolele. Lithoko tseo tsa mehla ea khale li momme ho hong, sefela sa mehla ea khale, nka mpa ka fuoa

tsona sebakeng sa lithoko tse ncha tsena tse keneng tsa lefatše, le kahara likereke tsa Bokreste. Ke rata tseo tsa mehla ea khale, ke rata.

Jesu, 'fapanong sa hao, (Khele!)
 Selibeng se bokoang,
 Molapong oa pholoho,
 O kopotsang Kalvari.

'Fapanong, 'fapanong,
 Oh, tlotleng ea ka mehla;
 Moea' me o tla phomotsoa
 Mose lelibohong.

500 Nka hloibila habonolo lefatšeng ha e binoa. Le lona ho joalo? [Phutheho e re, "Amen."—Mong.] Ha se le ho babatseha bo! Ana tsohle li batalalitsoe? U a tseba, ke thabetse ha ke batalalitse hohle. Lona ha lea thaba na? ["Amen."] Molato oa khale o phumutsoe, khale koana. Ke Mo boletse, "Morena, ha ke batle mathata a letho tlase lelibohong. Ke—ke batla ho kholiseha joale." Ke batla ho Mo tseba. Ke batla ho Mo tseba.


501 Ka pel'a e mong le e mong oa rōna, ho eme sekoti se seholo se lefifi. Re habile teng. Nako le nako ha pelō tsa rōna li otlā, re atametse haufi le haufi. Empa mohla ke fihlang teng, ha ke batle ho dumaela joaloka lekoala, ke batla ho itšopha ka likobo tsa ho loka ha Hae, ke kene kahara sona, ke tseba taba ena, ho re, "Ke Mo tseba matleng a tsoho ea Hae." Hore, mohla A bitsang, ke tle ke tsoe hara bafu. Khele!

502 *Tumelo Ea Ka E Ho Uena*, ha re e bineng joale.

Tumelo ea ka e ho Uena,
 Uena Konyana Kalvari,
 Oho Moloki oa ho Loka.
 Nkutloe joale kea rapela,
 Tlosa sebe sohle sa ka,
 Ke se lelere hle
 Ka sutha pel'a Hao.

503 Joale, uena Moruti e moholo, U re rutile kahara Lentsoe la Hao le thekothata ka ho fetisa, lipelō tsa rōna li thothometsoa, ke mohau o hloibilang, ho tseba hobane re tlohile lefung ho kena Bophelong. Tsohle li entsoe ke ho loka ha Morena oa rōna Jesu, Ea re bitsitseng, ea re hlatsoitseng Maling a Hae, a re hlahisa ka pel'a Terone ea Molimo re se na, molato, sekoli, hobane O jere libe tsa rōna. Ha re na sebe. "Molimo o Mo jarisitse makhopo a rōna ohle, 'me O tetekilo e ka baka la litlolo tsa rōna." Oh, kamoo re Mo ratang, Konyana e kholo eo ea Molimo!

504 'Me rea rapela, Ntate, hore U tle u re fe lipolelo, litlhaloso, re tle re bolella ba bang; ba tle ba Mo tsebe, le bona, ba Mo rata, hoba O a ba rata. Re fe mohau ona.

'Me re U leboha, Ntate, ka masea ao a tsoetsoeng bocha a sa tsoa kena 'musong oa Molimo. Ba ke ba fumane kereke e lokileng ea lehae kae-kae, teng ba U sebeletse hofihlela lefu le ba lokolla 'meleng ona oa khale o futhisoang ke letoto la mahlaba le mahloko, le ho ba hlahisa ka pel'a Hae ba se na, molato, sekoli, mongoaheng o tlang ho tla, ba ruile Bophelo Bosafeleng. Hoba re e kopa ka Lebitso la Hae. Amen. 

BUKA EA BAHEBERU

Melaetsa ena e leshome le motso o le mong ka Moena William Marrion Branham e reriloeng sethatong ka Senyesemane ho tloha ka Phato 21 ho haola ka Loetse 22, 1957, mane Tabernakele ea Branham, e Jeffersonville, Indiana, Amerika, e ntšitsoe mabanteng a likhatiso a makenete 'me e ngotsoe e sa khutsufatsoa ka Senyesemane. Phetolelo ena ea Sesotho sa Boroa e ngotsoe 'me e phatlalatsoa ke ba ha Voice Of God Recordings.

SOUTH SOTHO

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Krete. Buka ena e ke ke ea rekisoa, ea boela ea hlahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fua boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org